

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
NOV 4 1989

T 8133 / 3514. 88

0009

永平府志卷之十七

人物志

列傳

國朝

孟喬芳字心亭永平人以世胄從

世祖定鼎燕都簡任川陝總督三輔以外實惟憑藉時叛寇

賀珍連賊數萬圍攻西安聲勢震撼公親御敵樓鎮靜

無譁城中市沽不變若不知有賊者遣總兵陳德軍西

門任珍軍北門突衝賊營斬其驍銳復會長兵合力追

擊直抵永壽斬首萬計公身不解甲日不交睫者七晝

永平府志卷之十七

哈佛大學漢和
圖書館珍藏印

人物志 三

列傳 下

國朝

孟喬芳字心亭永平人以世胄從

世祖定鼎燕都簡任川陝總督三輔以外實惟憑藉時叛寇

賀珍連賊數萬圍攻西安聲勢震撼公親御敵樓鎮靜
無譁城中市沽不變若不知有賊者遣總兵陳德軍西
門任珍軍北門突衝賊營斬其驍獍復會援兵合力追
擊直抵永壽斬首萬計公身不解甲目不交睫者七晝

夜未嘗言瘁嗣有河西猢猻之亂兵號百萬朝議將發
大師公疏請以身任督標將星馳秦州密授總兵馬寧
張勇等奇策以精騎五百夜擣賊營悉驚潰遂解鞏昌
之圍并恢復五涼甘肅擒斬米喇印丁國棟等而河西
遂平山西姜瓖餘氛勢逼太華公奉命疾馳移兵朝邑
聲揚航河陰令總兵趙光瑞就潼關飛渡一戰復蒲坂
再戰破陸村三戰平芮絳逆魁授首餘黨出降太行以
西華嶽以東莫不懷德投誠會寧夏告警公計連間謀
誅擒梟孽而興安之釁永消從此峭函高枕無憂矣公
雄才偉畧氣度寬和且能隨材任使宥過賞功故士皆
樂用所向克敵凡屬吏將校及紳士編氓莫不畏威戴
德順治十一年卒於官

勅賜祭葬贈太保諡忠毅入祀鄉賢子三熊臣知汀州府事
熊飛監察御史熊弼襲阿思哈尼哈番世職

蔡士英字伯彥號魁吾漢軍正白旗人其先世以軍功襲
錦州左屯衛千戶我

大清順治元年授牛叅章京世職從 英王討李自成擒
流賊掃地王於霸州三年從 經濟王收福建五年授
僉都御史尋遷右副都御史六年征叛鎮姜瓖克朔州
及汾州府加授阿思哈尼哈番世職九年遷兵部右侍郎

郎巡撫江西時海宇初定流亡未集土地荒蕪公因請
撫夏一鶚請豁荒田稅糧據實覆查題報得奉

恩旨準與除豁民困大舒又瑞州府自明初奸民黎伯安以
僞寇陳友諒索餉倍徵之冊抱獻遂爲定額而袁州府
亦以明初僞將歐祥歸附之時投獻冊籍誤以鄉斗之
數報作官斗終明之世不改公因布政使莊應會之奏
確查前元舊額得減浮糧二十餘萬石爲二郡永利乃
分遣將領擒斬土寇劉京李文斌楊文苻烈蘧穎等各
郡底定招集流亡開荒築室親行區畫民賴以安先是
有言廣信府封禁山出木植者工部覆奏

勅查是山初名銅塘因其峭險屢爲盜藪歷代以來皆行封
禁公謂此舉一行不獨凋殘之民疲於奔命且恐啟奸
人之亂謀爰取具先朝封禁圖說具題力陳其不可
事遂寢十二年遷漕運總督兼巡撫鳳陽等郡亦多建
白如清歸屯田以資其恒產編派閑丁以幫其造費買
補船隻以充其缺額蚤給行月二糧以裕其食用可謂
軫恤備至矣十四年以疾告歸十六年海氛內訌瓜儀
失守復起公前任時江北大水流民載道公設法散賑
復請蠲淮鳳徐揚四郡銀米東南依以爲命尋遷兵部
尙書十八年再乞休歸康熙十三年卒

勅賜祭墓謚襄敏碑文稱其性行端良才猷亮敏所著有撫
江集督漕奏議崇祀鄉賢及江西名宦淮揚亦祠祀焉
康熙四十四年

聖祖仁皇帝南巡駐蹕金山

御書奏績東南扁額

賜其祠子四長毓貴早世次毓榮雲貴總督加綏遠將軍另

有傳次毓華遵義府知府季毓茂京口副都統毓秀其

猶子也亦以公廕任永寧知州

管聲揚字鳴鑾號鳳崗盧龍人明崇正己卯舉人國初任

常州水利通判操守清廉職務勤慎雍正鹽法清

務築堤濬塘大興水利丁內艱服闋三院交章題薦以

疾辭士論高之子鞏祚邑庠生謹厚尚義孫三伯

庠生仲名標康熙丙子舉人

呂鳴章字大呂山海世胄嘗遵父命讓爵與弟順母心讓

產與弟以官廕子姪又為亡姪立嗣其孝友如此前明

天啟元年恩貢初任許州州判當事重其才任以撫寇

深入壘巢能不辱命比旋寇叛躬率家丁巷戰力保危

城百姓尸祝之尋遷京衛經歷以內艱歸甲申革命佐

舉義旅大戰石河努力殲寇錄功補戶曹員外郎歷陝

西分守關西道右叅議致政歸家居二十年間耕課讀

清素自甘子燦如由貢生歷黃陂宰

郭仲金山海衛人以孝聞前明崇正八年貢爲良鄉教諭

訓士有法擢平陰令政簡刑清教養備至任所不攜眷

屬衙署用度一皆取之於家羣稱廉潔以卓異遷安陸

府同知卒於官康熙五十四年崇祀鄉賢

畿輔志

高選山海衛人以廩生錄功授山西交城令陞知平陽府

事改江西廣信府同知英敏練達所至有聲其治交城

尤久交民德之康熙五十三年崇祀鄉賢

縣志

穆維乾字介公號圭炎山海衛人少嗜學博經史領順治

乙酉鄉薦爲滑縣教諭遷保定左衛教授整飭學規課

士有方嘗攝滿城邑篆值旱荒設法賑濟全活甚衆巡

撫金公疏薦云行同濂洛關閩才類韓柳歐蘇真實錄

也陞翰林院典簿時修四書滿漢講義至羔裘元冠不

以弔掌院葉公方藹爲犯

聖諱商於同僚俱不能對乾謂大字當仍原字以尊經小註

改元字以避諱掌院詢何所本曰中庸慎獨乃原字小

註改謹字掌院大悟云余自幼疑此今始知朱子爲避

諱也深加敬禮預修

太宗文皇帝實錄賜白金文綺及歸休林下講學論道誘迪

後輩殷殷不倦生平廉節自持不慕權勢鄉望特隆康

熙五十三年卒崇祀鄉賢

卜昌運字泰寰東勝衛人順治二年貢除南宮訓導遷東光縣教諭羣盜猝犯城運率家僮登陴奮呼隸卒礮擊渠魁城賴以全擢知江都縣卒于官

陳性天樂亭人順治乙酉舉人應省試時於逆旅得遺金不開緘閱九日失金人號泣而來原緘授之後授宜川令地與米脂接壤闖賊亂後人民凋敝撫字勤勞六七年間境內大治去官日邑人建清風閣以志遺愛康熙五十三年祀鄉賢

畿輔志

石申字仲生灤州人明副使維嶽公子登順治丙戌進士

選庶吉士視學江南搜拔孤寒所取士多掄大魁歷遷學士經筵久資啟沃擢吏部左侍郎矢公無欲門絕苞苴以抗中忌奪職後事定起補刑部左侍郎上慎刑疏天下傳誦丁繼母艱服闋補戶部左侍郎總督倉場舊例厨餼交際取資斗級衙僧藉恣吞啗公一切罷去綜核無遺釐清夙弊值慈母訃聞歸里嬰疾而卒

勅賜祭葬祀鄉賢先是

世祖章皇帝稽古制選漢官女備六宮申女及笄承

恩賜居永壽宮冠服用漢式

勅召申妻趙淑人乘肩輿入西華門至右門下輿入

永平府志 卷之十一
宮行家人禮

賜重筵

賜紵賞賚有加後封恪妃

劉鴻儒字魯一遷安人父光裕有行誼鴻儒登順治丙戌進士歷官戶科給事中

國初額賦未定吏胥因以爲奸派擾滋甚鴻儒疏請

頒賦制以甦民困

詔從之又條上京東鹽法語極切直其在通政有遵

諭陳言疏在兵部有請開海禁疏在戶部有酌議錢法疏及

官都憲疏免逋賦復論封疆大臣不宜拘以文法隳任

事之心請勅部破例以收寔效爲科臣所劾歸康熙三

十八年父子並祀鄉賢

畿輔通志

李成性遷安人登順治丙戌進士任新城令撫綏殘邑克

著循聲未幾乞休歸隱居山莊讀書嗜古老年弗倦鄉

人推爲理學先型

余一元字占一號潛滄山海衛人登順治丁亥進士初授

刑部主事遷禮部歷儀制司正郎水蘖自持端方謹飭

時以清正稱加從四品告疾還里閉戶著書屢徵不起

立社講學啟迪後進從不干謁有司若事關學校及地

方興除大務必力爲救正遠近倚爲師表所著有潛滄

文集八卷重修山海關志康熙二十九年崇祀鄉賢

胡來相號玉衡永平人事親孝謹居恒言動每以古人自

期順治四年筮仕元城令時萑苻未息大河以北騷然

煽動天雄為畿省要地公矜撫流亡人心賴以寧固且

開諭恩信賊相繼降附以卓異擢山西道監察御史有

謇諤聲巡按湖南首以除盜為已任區畫戰守動中機

宜尋掌河南道陞太常寺少卿卒於官子祝歷河南道

御史

高顯辰字欽思灤州人順治戊子舉人授德安令擢補南

寧郡丞陞雲南守時吳藩赫奕麾下虐民輒移文該管

諷刺之或途值即面叱其非上官同僚每勸勿撻其怒

應曰吾輩

天子之吏何可詭隨異姓王之帳下兒耶卒以是得禍當

吳逆之變也逼司府入欲授偽職公拒詞蕙幾斃杖下

遂放于北洱自此絕音耗公當放時原配戈氏已自經

女適滇臬李興元子毓秀隨滇任李同時受禍更慘云

崇祀鄉賢

崔維嶸字嵐峯盧龍人明舉人啟亨公子年十四被俘至

遼

太宗詢知為啟亨子曰是求死不作知州人子乎勉事吾勿

辱汝父也順治五年以貢授清豐令時值畿輔盜賊未靖躬率親屬殲渠魁釋脅從豐邑遂安陞興安知州招集逃亡貸粟勸墾期年民用輯寧因防兵擾民執法繩之與守將忤竟鐫級歸遂絕意仕進在廷故舊招之不往晚年廬於漆西先塋者九年鶉衣糲食惟一蠶僕傭日以給每晨起哭拜母墓手掬土培塚植木四週子廷瑜中康熙癸卯舉人任全州刺史解組歸迎養玉田堅不允所奉悉揮却之年八十有六卒

房星煌字肫如山海衛人旗籍順治五年貢授睢州牧與利除害不畏權勢陞漳州知府者民爭相肩輿泣送數十里其治漳設隄防嚴城守閩南倚爲保障

張鍾英號瑞峯其先遼東義州衛人父玳天啟時司諭廬庠遂家盧龍膺順治五年貢筮定陶令甫下車土賊糾衆圍城英率衆屠勦射中賊渠餘黨悉平于是除荒蕪招流離重賓興復鄉飲治行稱最陞黃河同知去陶日士民鑄石德之癸巳河溢堤決石香爐富家集南北一帶民居漂溺英住守河干多方修築節物力恤夫役民之居者役者胥賴安全陞福州府知府以修河積勞未任致仕

趙映斗遷安人登順治己丑進士任吳堡令邑敝民貧加

意撫綏不事紛擾因呈誤鑄級事白補馬邑廉能有聲
翟鳳翥字儀軒盧龍人少孤力學素履端方燕居雖盛暑
必冠以明經司訓平山見學宮傾圮竭力倡修年七十
餘予告歸猶披覽經書弗輟子二長儁次任俱庠生任
幼失恃事繼母以孝聞父喪哀毀盡禮生平盛德尙義
咸以長厚稱孫正經康熙癸酉舉人壬辰進士令建平
張星煌字斗輝盧龍人拔貢生以通判改授襄陽衛經歷
攝篆宜安及均州事治政明決督撫漕三院薦最陞東
昌府同知冰蘖自矢代州事呈誤回里與同志講學問
字食貧不怨溫良之度人樂近焉

譚從簡山海衛人順治甲午舉人授故城縣教諭訓士有
方陞靈邱令以憂去官服闋知南婁縣事改調河南孟
津終雲南晉寧州牧所至有聲不事明察而吏不能奸
寓催科于撫字民德之咸樂輸無後勤勤以教養爲事
不博聲譽用是無赫赫名而有去後思性孝友輕財能
急人之難好讀書尤邃于易康熙五十三年崇祀鄉賢
按臨榆縣科貢志載從簡爲順治甲午舉人人物傳
則云康熙舉人乙未會試副榜然康熙甲午則其崇
祀之年也其誤無疑而畿輔志人物傳云副榜貢生
亦未確

田宗周昌黎人三任廣文賦性仁厚接人謙謹儼然有道
遺風司李尤侗贈匾曰人師國老享年九十有六

宋國賓遷安人以貢生知陝西隆德縣剛方果斷卓有政
聲隆邑賴其保障後家居著書鄉人咸重其品

崔巍字嶽生號坦菴盧龍人幼孤崇正庚午郡城陷母王
氏度不能免白經依兄嫂避難兄嫂利其產百計死之
賴母叔王如梅密收養之王業農弗令就學年逾冠里
胥欲派以倉役公耻之遂發憤力學入遷安庠後益自
攻苦遍涉經史繭足走京師受春秋于歸安尹平之先
生領順治丁酉鄉薦就武邑教諭修學舍課生徒鐸聲

丕振巍留心理學議論一宗紫陽時講學者多排詆陽
明巍曰致知之學孔孟真宗且陽明先生直諫勤王功
在社稷真以身講學者若隨俗以異端斥之不但得罪
陽明亦紫陽所不許也年四十八卒子三長璠拔貢次
璵庠廩季璨翰林院庶吉士

房星煥字皓如山海衛人旗籍由籌海功順治十五年授
南康通判壤接湖山崔苻時發公下車卽捐俸修理城
濠設礮石立旗幟盜跡遠遁以才能調兗州泃河通判
修舉廢墜百姓勒石紀德尋陞武德道副使卒于官

汪淑問字清公號邁陶東勝衛人幼失怙恃事祖父母以

孝聞委曲承志善慰祖心登順治己亥進士筮犍爲令
邑當草創居民僅六七家問竭慮撫綏招徠安輯著有
實效未幾以望誤解組士民擁馬首號哭失聲生平篤
交誼宦蜀時貧苦不能自存猶解俸以急友難客武昌
幕力贊死罪留養之例迄今永著爲令山左郡縣感問
之德多尸祝之居鄉力敦古道謙厚恂謹爲一郡典型
者垂五十年數舉鄉賓著有詩文集藏于家壽八十有
五卒子三長與臨次與賁俱庠廩生季與恒康熙庚辰
科進士

李煒然字含醇盧龍人貢生以州同改授江川縣知縣邑
數罹兵燹百姓流亡然發粟招徠多方安輯以土司變
解任士民鑄石德之

蔡毓榮號仁菴襄敏公仲子生而偉異弱冠任佐領旋擢
刑部郎中兼本旗叅領順治十七年隨征楚寇又調征
鄭國信海氛旣靖紳士多罹僞籍公矜釋甚衆有宦者
橫於市公執而撻之

詔問狀公俯對曰臣何敢撻宦者撻虐民犯法人耳由是聲
振長安晉京畿道御史時襄敏公居總憲持風節公繼
之行避驄馬人稱爲大小繡衣康熙元年遷秘書院學
士兼禮部侍郎五年歷刑部左右侍郎疏請除匣床苦

壽之刑七年轉吏部左右侍郎澄清銓政多所建白九年

聖祖仁皇帝特簡總督川湖鎮守荊州

上親解袍賜之着體猶溫十二年吳三桂反逼荆江公悉力守

禦一月之間鬚髮盡白十三年二月辛丑加公兵部尙

書銜四月部議以常澧長兵相繼陷賊應革職得

旨戴罪圖功八月己未

命率所部綠旗兵隨

王師協力平定地方是年襄敏公卒

上以公在軍恐傷其心誠勿訃踰年始知之請守制不許十

四年九月寧南靖寇大將軍多羅順承郡王請以綠旗

精兵七千分爲援勦二營

詔公專轄十五年二月公率兵渡江追至荊州賊望風逃竄

退守松滋益挖壕築城置滾木鐵簽排鎗砲火甚密故

我兵彌年不能攻十七年三月

詔公與安遠靖寇大將軍貝勒尙善入湖破賊五月公率標

兵與大軍進洞庭湖軍君山西岸柳林嘴賊屢乘風來

犯公親臨戰冒鎗矢大小十餘戰皆大捷斬獲有差是

年吳逆死於衡州十八年正月僞將軍吳應期遁餘衆

降公入岳城安撫常長衡永諸郡相繼復乃疏陳進勦

機宜

特授公綏遠將軍印總統綠旗官兵時在事文武大員多名位相埒咸相顧貽愕及建旗鼓會諸將申明約束諸軍肅然十九年三月公親督大軍攻辰龍關分撥諸將由辰州坪巫溪蒼溪等處潛師入賊方拒敵伏兵並發出不意棄關走而芙蓉亂石雞鳴馬鞍等關皆破八月統兵進取貴州十月公同定遠平寇大將軍固山貝子章泰領兵抵鎮遠恢復府城三十年二月大兵先後至雲南省城大敗賊衆十一月逆孽吳世璠自殺逆黨以城降雲南平疏 聞

上以公勞績茂著復其原官二十一年六月

命公爲雲貴總督兵部尙書加正一品銜仍留綏遠將軍印勅爰上等籌滇善後十疏其一蠲荒賦其二制土人其三靖逋逃其四議理財其五酌安插其六收軍器其七議捐輸其八弭野賊其九敦實政其十舉廢墜俱奉

俞旨次第舉行雲南至今賴焉二十五年移總督倉場戶部左侍郎轉兵部左侍郎尋以罪革職發遣口外未幾復召還康熙三十八年卒公任雲貴總督時撫輯流離咸得其

所滇之士民思之公請崇祀名宦祠子八長琳內廷職事食主事俸次珣海鹽縣知縣餘俱未仕

孟熊臣字輔昌永平人忠毅公猶子由蔭生初知保德州
治政明恕不事敲朴嘗稱貸二千餘金代民償逋秩滿
陞汀州郡守時海氛未靖軍務繁興汀屬不困于粟米
力役者咸臣申請有方也順治十八年攝漳南巡道篆
奉令安插海兵星馳詣杭請于東郊造營房以居之又
具詳家口糧額俾不病民杭民德之家居謙和謹厚籍
紳家稱由禮者以臣爲最云

喻成龍字武功其祖父從

龍定鼎卜居漢州公弱冠以恩廕任江南建德令廉明仁愛
膺卓薦值吳耿叛時公雖離任撫軍壯公才畧分兵協

勦親冒矢石所向披靡獲從逆姓氏簿卽焚之保全
多士民不忘遺愛勒石塑像迄今蘭臺山猶尸祝焉
授池州郡丞督軍需赴荆岳勞績茂著卽題授本郡守
當軍興膏午督造戰船刻無寧晷公猶加意民食所屬
各建義倉積穀民樂輸至數十萬石遇歉分給民不苦
飢剏建書院置學田積藏書暇則與生童討論俾從事
經濟實學池于江南爲小郡一時彬彬稱盛丁內艱去
補江右臨江府地瘠民貧公撫字噢咻循聲大振擢山
東漕運轉臬藩連任山左俱有治績適遼東歉收議令
撫軍由海運粟濟荒

詔特委公載糧百艘星發海若効靈不揚波者數月活遼民
萬億一歲之內晉罔卿廷尉少司空三遷顯秩人皆以
爲榮公悚惕益甚乙亥歲北鄙跳梁復

詔公運糧兩經大漠直窮西海軍食未嘗稍缺敘功轉少司
馬奉

命看河敷陳無不報可因發帑修築同事九人凡所建豎多
出公裁漕運賴之覆

命顧問諄諄條對悉當

簡總督湖廣隨

駕南巡

恩賜華袞扁對詩章字帖甚多甫涖任會征紅苗勦除十餘
寨撫綏五百餘寨恩威互施楚地以寧解組歸以讀書
吟咏自娛有詩集行世

閻允吉字卜子號留亭廬龍籍昌黎人康熙癸卯經魁仕
通州學正陞江南徐州蕭縣令山東兗州同知調淮海
屯田缺裁補四川成都府同知陞江西撫州府知府卒
於官崇祀名宦郡人設像立祠其祠碑畧曰公孝女性
成學問淵邃所歷之區食其德而蒙其休者在在有顯
烈焉迨涖我撫也網舉目張利興弊革其愛民也寬而
有法其馭下也嚴而有體其晉接邦之紳士也恭讓而

有禮樂易而可親相引于道義之則而不瀆以私守如是可不謂賢乎觀此亦可以概其生平矣

倫品卓字宣明灤州人性倜儻不羈以選拔筮仕江西南康倅治有循聲康熙辛亥南康大饑公貸請帑金三千兩買運減糶康人賴之康地處下流舊制米交漕運舟多漂溺若上倉發兌靡費不支卓力請督漕以康米竟達京口著爲例壬子押運力除私折盜賣諸弊先期抵通倉漕合疏薦舉值康守乏卽擢典匡郡重士保赤習俗丕變重修白鹿書院及郡學甲寅冬饒賊逼城守兵寥寥卓激勸鄉練乞援會勦日戰三捷殲渠獻馘地方以寧

上嘉其功勅部議敘會丁外憂以金革奪情計撫僞官百二十餘名僞兵七千餘人餘孽悉平無何失意重臣解組歸徜徉詩酒壽至八十有五卒子三長可久任陝西慶陽府同知仲可大任山西澤州知州季可經府庠貢生張宏字宥涵昌黎人康熙壬子拔貢授河間府肅寧縣教諭歷九載課士有方才能著績陞浙江新昌縣知縣單車赴任一應鋪設輿蓋儀衛之屬絕不介意每日邑民甚苦吾豈獨甘耶先時縣署日費米燭等類俱發官價里長賠累疲于奔命宏到任毅然除之甫下車有謀財

害命者捕兇手無蹤跡宿城隍廟積誠默禱恍惚夢一人立堦下神指曰此朱買臣也寤而思謀死者賣珠客也珠則爲貝買臣者四人分貝也遂單騎密訪果得之獄以決人稱神君新邑田多荒蕪鄉民以積逋爲憂莫敢墾種宏徧諭城鄉令各自開墾准爲世業免舊欠給以牛種邑遂稱樂土焉在任五載卒于官崇祀名宦邑人公建生祠子四蕢夔著俱廩膳生蔚康熙乙酉舉人蔡珍字左才襄敏公孫遵義守毓華長子康熙壬子舉人授中書舍人陞典籍轉武關同知勤慎練達治績著聞秩滿遷員外郎補禮部陞工部郎中敷歷曹署守正不阿擢監察御史風裁審諤直聲不振

劉偉字遠公灤州人幼嗜學性倜儻不羈父昌泰以明經司論定興偉省侍克承庭訓爲文博雅堅勁康熙乙卯韓慕廬先生主順天鄉試闈中得偉卷大加欣賞定第一行稿出傳誦遍天下乙丑捷南宮選庶吉士丁卯授監察御史巡視東城風裁高峻聲著臺班卒于官遺橐蕭然

蔡珽襄敏公從孫幼穎敏讀書舅氏家沈潛力學言笑不苟康熙癸酉公年十七中鄉試丁丑成進士改授庶常屢掌文衡六十一年授四川巡撫雍正二年罷官次年

復

詔授左都御史充經筵講官議政大臣吏兵兩部尚書正白旗漢軍都統充

實錄會典明史三館總裁署理直隸總督五年降補奉天尹緣事革職繫獄十載迨

今上登極得赦乾隆八年以疾卒公平生孝友敦倫宗黨無間言舅氏亡遺孤幼割宅以居之飲食教誨以至於成立性剛介不能容人過人亦不敢干以私博文廣識工詩古文辭翱翔詞館者二十年後進無不推爲宗匠又力能挽強善騎射擊劍運矛皆其餘事老年更究心禪理淹通釋典有所註楞嚴經及金剛經人以爲夙慧云其詩文集藏於家未及梓

張霖字汝作撫寧人幼孤嗜學弱冠遊庠以貢生任工部營繕司主事母老告歸顏其堂曰愛日色養曲至居憂哀毀盡禮起補原官尋陞陝西驛傳道

上念陝爲巖疆欲增置道員難其人廷臣交薦公

制報可時陝饑民多流亡霖設法捐賑全活甚衆遷江南上江按察使治獄多平反會皖江兵冗議裁軍士洶洶譁當事門霖推誠諭慰遂輯遷福建布政使舊錢糧解藩庫有羨耗陋規悉除之生平慷慨樂解推待以舉火者

不下千百家尤喜爲詩古文詞與四方知名士唱酬無
虛日加意桑梓人文于邑之學宮旁創義塾十餘間多
所成就子增候補光祿寺典簿坦壘俱康熙癸酉舉人
壘任中書科中書舍人坦候補光祿寺寺丞壘候補主
事

倫可大字子受灤州人髫年爲諸生隨父品卓之南康任
適滇黔逆警左右其父于軍前屢建勞績寇平父爲大
吏誣劾可大奔走幹旋事遂白以貢生仕西蜀新津令
當被兵後邑無城郭祇穴處二十餘家可大斬荆棘招
流亡墾荒除賦五年生聚轉瘡痍于衽席薦陞粵東化

州牧州多未完積逋紳衿咸遭繫辱概與寬釋至鑄十
五級甘之如飴而逋亦竟蘇丁內艱服闋補山西澤州
杜絕苞苴革除陋弊時有齟齬以白金三千賄卽白上
司奉有加級

優旨 在澤十年手著濩澤政紀可垂治譜會鹽梟構禍可大
與叅戎率兵往視梟民聚衆對壘叅戎卽欲屠戮可大
力爲勸阻因單騎開諭梟民感泣羅拜旋卽解散緣此
遂干望誤去澤之日民扶老攜幼攀轅號泣建立生祠
歿後遠近老穉匍匐赴祠號奠者旬日其德澤深入人
心如此大學士澤州陳公廷敬誌其墓

吳班字彬如號朗山樂亭人領康熙庚午鄉薦性孝友敦
義讓族有侄孫婦新寡爲之立嗣撫恤二十餘年授以
產業無德色振興義學先後景從者數百人皆能因材
成就如李方伯諸人皆其高弟也初李公髫齡從學卽
納之爲壻曰此人傑也其識力過人如此康熙末年爲
井研令持躬耿介罕所合二年卽告歸居鄉以講學明
道維持風化爲務雍正三年舉鄉飲大賓壽至九十餘
無疾而終

高天挺字本天昌黎人康熙甲戌科進士初令臨淮著慈
惠聲縣當江淮之衝田被水而猶納糧者名曰水沉田
邑民受其累甚至鬻男女以償官逋公到任卽力求督
憲奏請豁免民困以蘇又捐俸設學擇秀良者親爲督
課由是人文日盛在任五年丁母憂回里淮民如失慈
父母焉後補隆昌令地苦民瘠役重差繁益加意撫恤
未嘗受一錢枉一法又曾判疑獄雪奇冤人服其神年
六十五歲卒於任歸櫬之日士民泣送百里不絕兩邑
皆立祠祀之

崔璨字淡餘號茗菊遷安人武邑學博巍季子五歲孤九
歲五經成誦康熙癸酉中副車貢入成均己卯鄉薦第
四魁麟經己丑成進士選庶吉士性恬靜篤孝友事母

色養備至嚴事兩兄長兄性剛怒責卽長跽以請非怒解不敢起自童子至爲官皆然生平無疾言遽色雖清貴益自謙抑善詩古文詞著有式好堂集藏于家年四十三忽遘疾卒于官

姚采樂亭人延嗣子康熙間拔貢授內黃教諭勤于訓誨多所成就擢國子監學正尤以振興文教爲兢兢遷刑部司務轉工部主事以親老假歸侍膳承歡終養盡志越十年起補授工部員外郎嘗監厥務綜覈嚴謹吏胥

肅然

縣志

張翰宸昌黎人以明經任翁源令多惠政擢長沙郡守潔已率屬政治廉明活無辜九人獄無冤滯致政歸捐貲訓課啟迪後進值歲歉煮粥賑貸待舉火者不下千百家邑人感之請祀鄉賢

張蔚字雲升昌黎人宏子康熙乙酉舉人居家孝友爲諸生時卽以成就後學爲已任敦實行不務虛聲選授沂水令清介自持執法平允有以暮夜之金至者蔚惕然曰蓋爲此乎稍不自謹大節虧矣因力請告休乃改教諭授良鄉縣學崇本抑末堪爲多士模楷兩載以病卒於官

姚協于樂亭人熙長子登康熙丙戌進士任會稽令廉以

勵已和以處人勢豪奸吏畏威懷德涖任四年修黌宮
設義學葺城池築石塘善政多可紀邑人思之崇祀名

宦縣志

萬瑄昌黎人康熙己丑進士初任山東鄒縣令下車時兩
麥不收不待憲檄卽爲停征詳請賑濟文方申卽開倉
借糴迨得請饑民已更生矣各憲嘉其能檄飭各州縣
效之全活者數萬人事無大小曲直立判雪孔生之奇
冤至今其家尸祝焉歷任六月卽丁內艱服闋補河南
內鄉縣當闖賊殘破之後多新附之民疆界不清訟獄
繁興瑄爲之一一清釐且除陋規五十餘條後以年高
致仕歸卒于家

高榮萼字仲篋號念菴昌黎人康熙己丑進士授浙江景
寧令景寧本山邑疊石爲田雨稍愆期卽苦旱公爲之
興水利引泉灌溉行之數年水道修而民享其利先是
邑有積逋累至數千公寬其期推誠開示及秋稔爭輸
過半其力不能償者萼悉爲代償民困以甦歲歉必以
上聞請賑報可卽親身履勘散發不假胥吏民皆實受其
惠捐修文廟悉出俸餘攝永嘉篆邑有宋文文山祠萼
爲請置春秋祀萼性仁愛甘淡素一切皆自僱募不以
累民其爲治也興利除害汲汲若不及涖景十年中間

攝篆者凡數邑所至有聲中丞奇其才以堪勝海疆薦
入

覲還浙冒暑得疾卒邑人感其德立祠崇祀有文稿未傳
於世

李本潔字澄庵盧龍人康熙癸巳舉人授粵東廣寧令邑
有虎患多金募捕卒絕其害遇水旱極力拯救民賴以
生捐修義學纂輯邑乘致仕後士民思之家居閉戶每
日猶必披閱小學曰我輩學問只以內行爲基此處一
缺根本乃虧矣生平言行不苟接物以誠有德于人未
嘗矜伐一時共稱長者年八十四卒著有寧陽政畧公
餘錄諸書

餘錄諸書

張元復字桃岩昌黎人康熙丁酉舉人少有志節初任玉
田縣教諭接諸生以誠持寸衷以恕秩滿陞大名府教
授繼遷靖江縣知縣聽訟明允案無遺牘慈惠之聲洋
溢遠近邑濱江蘆葦課田愚民貪目前利爭認爲己業
其後水漲隨坍多有累及子孫者復力請撫軍奏請開
除民困乃甦治靖五年潔已愛民勸農課士興大利除
大奸不動聲色事無不濟致仕歸焚香哭送者不下數
千人居九年舉鄉飲大賓壽八十有四無疾而逝
李蘭樂亭人字汀倩號西園蚤失怙恃奉繼母以孝聞家

貧率諸弟芸歲等力學不倦康熙丁酉領順天鄉薦第一戊戌成進士選庶常授翰林院檢討飲食服用如布衣時尋擢戶科給事中諫議能持大體外補江西督糧副使遷湖南按察使歷江西按察使布政使改安徽布政使所至威望嚴重正己率屬吏無容奸民皆安枕年四十有五卒于官蘭學問淵邃崇尚雅正甲辰科典試江南癸卯甲辰兩次分校南宮所得士皆名俊任江南時定議開江浦朱家山河吳人賴之卒後廕子掖垣官光祿大官正擢大理寺丞再遷湖南桂陽州知州今補河南彰德府知府

姚敷于樂亭人康熙戊戌貢入太學性孝友色養承歡務得父母心閉戶課讀不干外事鄉里有盛德長厚之稱邑令沈繼賢重之舉孝廉方正辭不受

馬璐字玉軒昌黎人雍正丙午舉人授福建清流令歷任五年建學宮修義塚案無停獄民不忍欺至今邑有祠宇後調任邵武有董姓侵佔學宮地業經百餘年矣璐爲清查釐定盡還學宮邑東門外有激湍大河捐俸倡率修萬安橋十七丈民不病涉上官差役擾民者捕治不少貧署建寧府同知因病請休回籍年八十以壽終馬拱辰字廷樞昌黎人雍正己酉舉於鄉學問淵博志潔

行芳事親以孝聞性寬厚待人平恕約躬廉潔有萬石
風爲高陽教諭課士勤懇諄諄以立品爲先奉委賑濟
務使人沾寔惠每語人曰百姓嗷嗷寧過於厚毋失之
刻至今高陽士庶猶誦其德焉致仕家居以耕讀課子
弟不與外事長男元浩次子元魁同登乾隆丁卯科武
舉三男元愷乾隆乙酉選拔

石彬灤州人以貢生舉孝廉授清源令自太原縣之高家
堡至牛家寨開永濟等渠共一十五道享灌溉之利者
幾徧清邑邑民爲立石公渠碑記因頌曰渠開東北膏
澤霑足惠被無疆介我禾稷源遠流長仁者之福陞雲

南羅平州牧卒於官

何漣盧龍人爲邑庠生居家孝友敦睦宗黨雍正七年正
定司馬宋公以賢良方正保薦簡用知縣初任山東
泗水再任武城清廉愛民裁權關冗稅革鹺務陋規陞
任濱州知州剖雪疑獄判決如神致仕之日士民攀轅
不絕如嬰兒之失慈父母公建生祠以祀子之杞丁卯
舉人孫焯勳焯相繼入泮

閻公銑字丹赤號惺甫昌黎人天性孝友博極羣書工詩
文爲諸生卽名噪一時主北平書院樂育後進門人擢
巍科採芹藻者更僕難數雍正乙卯膺選拔遂舉於鄉

丙辰成進士歷任浙江縉雲麗水嘉興平湖諸縣令陞
 貴州鎮寧威獨山等州牧所至稱神君焉精于吏治臨
 大事而不眩其興利除弊一切善政難以枚舉而其最
 著者令嘉興時捕拐匪富大搜其舟得採生折割克具
 骨殖藥物等類究其黨與富子文等數十人置之于法
 士民稱快其令平湖也訪陸清獻公之裔綿其奉祀倡
 修當湖書院用廣理學之傳其牧鎮寧也雪陷獄之沉
 寃其牧獨山也清積年之舊贖去之日士民泣送於道
 勒碑紀石設祠以祀

文苑

後魏

衛冀隆遼西人官國子博士為服氏之學上書難杜氏春
 秋六十三事

金

王元粹平州人為南陽酒官有詩名詩見中州集
 任詢灤州義豐人正隆二年間授進士嗜詩書其文章行
 實載中州集善書法作真草隸篆氣完力勁世寶傳之
 歷北京鹽運使

按金史作易州軍市人與此不同

按碣石叢談曰金明昌間樂邑有斐宗智善篆書員
 祐末有張守謙善屬文皆有碑刻斐稱秀岩居士張

號天倪老人畧不見有名位殆逸民者流歟

元

楊紹先樂亭人中統三年進士至正中授集賢院司直學士德行文章爲世推重捐書於本縣學備庠生諷誦子塾仕至濟南路厭次尹善篆書不墜家聲見邑學碑

明

許莊字德徵灤州人登宏治癸丑進士知臨汾寶雞二縣俱有聲遷平陽同知歷陞山東僉事陝西叅議爲人卓犖博學喜著述有康衢文集梅花百詠心鑑警語諸作馮斗華字應垣灤州人萬歷丁酉舉人任長山令政尙簡

約公餘與學博諸生橫經問字句公文者相望以清直忤直指罷歸讀書不置所著有經書解義平平言二集以子運泰貴累封大中大夫太僕卿

張詩字子言別號崑崙山人盧龍衛民李氏子十歲避僉丁隨父母逃京師衡州同知張公抱以爲子張歿後訪盧龍得諸從兄弟哭諸祖父墓衡州卒乏嗣仍子之學文於呂涇野學詩於何大復徧遊天下名勝時以燕山豪士稱之所著有罵鬼詰髮笑琳七子等文善行草書岳氏雨華編以崑崙爲首云

劉景周字憲之盧龍人邑庠生有孝行性沉靜博研今古

手著易義心解三卷併編族譜家訓刻儉約說數千言
 高霄字雲冲擢之子官生任宗人府經歷霄本世胄絕無
 純穀習氣餐經味道攻苦甚儒生性蘊藉雖田夫乞丐
 亦深愛敬事繼母庶母皆中禮有詩一卷行於世子階
 亦能讀父書時人比之太邱彦方云任山西鹽運司副
 使晉開封周王相清望益著

張汝能字敷四灤州人事兄如父推產於幼弟訓戒諸生
 酷嗜詩古文詞門人王仲默嘗言奇字之學久無折質
 先生自蟲文鳥篆盡海彙諸書所載怪異不經見者罔
 弗詳其反切字義可謂博矣嗣文燦中副車州志

王仲默中丞鎬之曾孫灤諸生也風度秀挺齡年輒喜為
 詩文瘦媚若清蟬古木筆力超邁迥出人上善小楷自
 鑄石章細勁同漢瑑沒後郡人醵金刊其遺稿州志

蕭雲漢樂亭人富長子博學工古文詞貢入太學授大同
 府通判膺薦舉陞河東運同乞歸居鄉以文史自娛邑
 之銘碣多出其手子馨春任濬縣訓導發春任磁州訓
 導達春任芮城主簿縣志

國朝

李集鳳字翺升山海衛人生有異質十五餼于庠有聲屢
 躡場屋由拔貢授洛陽丞以廉明稱卒于官生平敦氣

節不慕權勢於學無所不窺尤深春秋嘗手註之凡六十五卷康熙五十三年崇祀鄉賢

姚熙樂亭人延嗣次子康熙戊寅拔貢性穎悟能文章閉戶讀書足不履市惟手一編以課生徒後學多所造就教子以義方長協于成進士次敷于明經次起陶次納于俱博士弟子員崇祀鄉賢

縣志

高履豫字奮齋號蓼劬昌黎人辛酉拔貢年少喜讀書經史每數過輒不忘中年絕意仕進著書自娛工楷法善屬文經其指授者學問俱有本源立品甚高而接物以和樂亭陳明府聘修邑乘攷核精詳迄今稱善

武功

後漢

郭涼字公文右北平人身長八尺氣力壯猛雖武將然通經書多智畧尤曉邊事初幽州牧朱浮辟爲兵曹掾擊彭寵有功封廣武侯建武九年爲雁門太守與驃騎大將軍杜茂擊盧芳將尹由於繁時其將賈丹霍匡解勝等殺由詣涼降詔送委輸金帛賜茂涼軍吏自是盧芳城邑稍稍來降涼誅其豪右郭氏之屬鎮撫羸弱旬月間雁門平芳亡入匈奴帝擢涼子爲中郎宿衛左右

見

杜茂傳

魏攸右北平人爲幽州牧劉虞東曹掾虞與公孫瓚有怨
密謀於攸攸曰今天下引領以公爲歸謀臣爪牙不可
無也瓚文武才力足恃雖有小惡固宜容忍虞乃止頃
之攸卒虞積忿不已率屯兵攻瓚大敗爲瓚所殺

宋

姚內斌平州盧龍人少仕契丹周顯德六年太祖從世宗
征次瓦橋關內斌以城降世宗以爲汝州刺史國初從
平李筠改號州又爲慶州刺史在郡十數年戎不敢犯
塞號內斌爲姚大蟲言其武猛也初內斌降其妻子皆
在契丹乾德四年子承贊密自幽州來歸五年幽州民
又以內斌兒女六人間道來歸太祖並召見厚賜之送
還內斌卒年六十四常賻外賜其子田三十頃承贊爲
供奉官閤門祇候死於陣

宋史

郭瓊平州盧龍人祖海本州兩冶使父令奇盧臺軍使瓊
少以勇力聞契丹爲蕃漢都指揮使後唐天成中挈其
族來歸明宗以爲亳州團練使改刺商州遷原州清泰
初移城壘未葺蜀人屢寇瓊患之因徙城保險民乃無
患受詔攻文州拔二十餘砦生擒數百人晉天福中移
刺警州屬羌渾騷動朔方節度張希崇表瓊爲部署將
兵共討平之連領滑坊號衛四州開運初爲北面騎軍

排陣使陽城之役戰功居多改沂州刺史充荆砦主兼
東面行營都虞侯擒莫州刺史趙思以獻改刺淮州俄
爲北面先鋒都監契丹陷中原盜賊蠶起山東爲甚契
丹主命瓊復刺沂州以禦盜瓊卽日單騎赴郡盜聞瓊
威名相率遁去漢乾祐中淮人攻密州以爲行營都部
署未至淮人解去會平盧節度劉鈇恃佐命之舊稱疾
不朝將相大臣懼其難制先遣瓊與衛州刺史郭超以
所部兵屯青州鈇不自安置酒召瓊伏壯士幕下欲害
瓊瓊知其謀屏去從者從容就席畧無懼色鈇不敢發
瓊因爲陳福福鈇感其言遂治裝俄詔至卽日上道瓊

改授州節練使又加防禦使時朗州結荆淮廣南合兵
攻湖南詔瓊以州兵合王令温大軍攻光州尋以內難
不果罷歸朝遣詣河北計度兵甲芻糧周祖祀南郊召
權知宗正卿事世宗征劉崇爲北面行營都監歷絳蔡
齊三州防禦使在齊州民饑瓊以已俸賑之人懷其惠
相率詣闕頌其德政詔許立碑宋建隆三年告老加右
領軍衛上將軍致仕歸洛陽乾德二年卒年七十二瓊
雖起卒伍而所至有惠政尊禮儒士孜孜樂善蓋武臣
之賢者也

宋史

元

王榮祿遷安人通兵書有謀畧以旗軍總從世祖征伐所向克捷累遷至昭武大將軍河南南路總管後遷鎮西夏體恤軍民撫番有方加都元帥輔國上將軍縣志

王仲仁樂亭人父統剛毅有力金末為裨將從帥鎮高麗東方以寧元初仲仁從奇渥擊信安兒有功授左監軍取金汴蔡擢先鋒西蜀事平賜璽書銀符中統初陞大都大同真定等路與魯都總管撫將士恩威兼至卒贈鎮國上將軍縣志

王珪仲仁長子襲官從兵四川至元二十年加授武畧將軍商州知州兼諸軍事持躬謙抑政事秩秩有條在任

最久商人德之見陝西名宦志至元末陞宣命武節將軍成都路總管官治中兼與魯等諸軍事子禱剛帶金符千夫長武畧將軍縣志

王祥統曾孫父珍至元間任興元路千夫長武畧將軍歿於王事祥從父至江淮發九矢斃九人以廕補忠顯校尉數立奇功晉武義將軍擢武畧將軍乃牙叛祥討平之加武節將軍累章求退詔許之蕭然野處訓誨子弟大德間卒贈金吾上將軍征行兵馬都元帥縣志

明

劉江山海衛總旗驍勇有謀畧洪武末從靖難累建殊勳

陞中軍都督府左都督永樂中鎮守遼東勦殺倭寇有功進爵廣寧伯卒贈廣寧侯

韓志字英氣昌黎人父文以靖難功官大寧都司指揮僉事志襲職從征有功正統間調邳州衛撫養士卒訓練依司馬兵法下皆畏而愛之十四年虜入寇被薦入衛景泰中從武靖侯駐大同天順初平逆賊曹欽累官都督府同知英宗時命帶刀侍衛寵遇日加致仕歸卒

畿輔通志

趙勝遷安人宣德中世官景泰元年累功陞都指揮僉事天順五年以討曹賊功陞都督同知已而充叅將出固

原捕虜有功成化四年陞都督充總兵官鎮遼東七年捕斬朶顏有功召還十二年修京城加太子太保三屯營總兵十九年封昌寧流伯食祿千石又明年加太保卒贈侯諡壯敏子先卒宏治年孫鑑乞嗣伯吏部言昌寧初封流伯鑑嗣世指揮使銓錦衣

周璽遷安人嗣職爲開平衛指揮使負氣節習兵書善騎射以征北功擢署都指揮僉事充右叅將分守陽和成化十六年累進都指揮使禦邊寇有功進署都督僉事遷大同副總兵十九年秋分守懷仁聞總兵許寧戰失利急還兵援夜遇敵乘勝前銳甚厲將士曰今日有進

無退大呼陷陣敵少却久之短兵接戰臂中流矢拔鏃
 戰益急與子鵬及麾下壯士擊殺十人會救至還以功
 予實授尋以右副總兵分守代州兼督偏頭諸關著邊
 功稱名將宏治初移鎮陝西討平扶風諸縣附籍回回
 三年佩征西將軍印鎮守寧夏甫一歲卒將死召諸子
 曰吾佩印分閫分已足獨未嘗大破敵抱恨入地矣連
 呼殺賊而瞑子鵬累官錦衣衛僉事

縣志

馬永字天錫遷安人生而魁岸驍果有謀習兵法好左氏
 春秋嗣世職為金吾左衛指揮使正德時從陸完擊賊
 有功進都指揮同知江彬練兵西內永當隸彬稱疾避
 之守備遵化寇入馬蘭峪叅將陳乾被劾擢永代戰柘
 崖白羊峪皆有功十三年進都督僉事充總兵官鎮守
 薊州盡汰諸營老弱聽其農賈取備直給健卒由是永
 所將獨雄於諸鎮武宗至喜峯口欲出塞永叩馬諫帝
 注視久之笑而止中路擦崖當敵衝無城堡耕牧者輒
 被掠永令人持一月糧營崖表版築其內城廨如期立
 乃遷軍守之錄功進署都督同知嘉靖元年金山礦盜
 作亂遣指揮康雄討平之塞其礦朶顏把兒孫結諸部
 邀賞不得盜邊永迎擊洪山口而伏兵斷其後斬獲過
 當進右都督已復馘其驍將把兒孫不敢復擾邊大同

兵變殺巡撫張文錦命桂勇爲總兵官往鎮而議將撫之永言逆賊干紀朝廷赦其脅從恩至渥也顧猶抗命今不勦春和北寇南牧叛卒勾連禍滋大矣宜亟調鄰鎮兵尅期攻城曉譬利害縣破格之賞令賊自相斬爲功元凶不難殄也乃命永督諸軍與侍郎胡瓚往會亂平乃還鎮永上書爲陸完請恤典且乞宥議禮獲罪諸臣帝大怒奪永官寄祿南京後府巡按御史邱養浩言永仁以恤軍廉以律已固邊防却強敵軍民安堵資彼長城聞永去遮道乞留且攜子女欲遂逃移夫陸完久死炎瘴非有權勢可託永徒感國士知欲效區區之報

不負知己寧負國家祈曲賜優容俾還鎮順天巡撫劉澤及給事御史交章救之俱被譴永竟廢不用永杜門讀書清約如寒士久之用薦僉書南京前府大同軍再亂廷臣交薦召至已就撫復還南京十四年遼東兵變罷總兵官劉淮以永代之太清堡守將徐顯誘殺大寧衛九人部長把當孩怒寇邊永擊斬之其族屬把孫借朶顏兵報讐復爲永所却已復入犯中官王永戰敗永坐戴罪遼東自軍變後首惡雖誅漏網者衆悍卒無所憚結黨叫呼動懷不逞廣寧卒佟伏張鑑等乘旱飢倡衆爲亂諸營軍憚永無應者伏等登譙樓鳴鼓大譟永

率家衆仰攻千戶張斌被殺永戰益力盡殲之事聞進
左都督永畜士百餘人皆西北健兒驍勇敢戰遼東變
初定帝問將於李時時薦永且曰其家衆足用也帝曰
將須文武兼寧專恃勇乎時曰遼土新定須有威力者
鎮之至是竟得其力都御史王廷相言永善用兵且廉
潔仍宜用之薊鎮作京師藩屏未及調卒遼人爲罷市
喪過薊州州人亦灑泣兩鎮竝立祠永爲將厚撫間謀
得敵人情僞故戰輒勝雅知人所拔卒校後多至大帥
尙書鄭曉稱永與梁震有古良將風

明史

蕭陞撫寧衛僉事累陞馬蘭峪叅將嘉靖癸巳大同內變

結連北鹵兵部推陞以副將協守大同陞至兵事戒嚴
內外不通陞詣督撫獻擣巢計以賊全部在內巢穴必
虛督撫任之賊遂瓦解陞前軍都督僉事鎮守薊州卒
賜祭葬

劉淵山海衛僉事剛之孫剛視山海篆有名淵自三河黃
花鎮守備入坐顯武營歷延綏遊擊宣府叅軍遷協守
副總兵陞後軍都督僉事掛鎮朔將軍印改鎮薊州有
名調提督西官廳聽征總兵官贈剛及父鎮官

祝雄廣寧前屯衛僉事調山海衛擢京營聽征叅將老營
遊擊偏頭關副總兵陞後軍都督府僉事掛征西前將

軍印鎮守大同改鎮薊州代淵善養士士樂爲用鹵入
塞率子男爲士卒先子少却立斬以殉鹵望旗幟卽遁
在鎮三年鹵馬不敢南牧名聞書于御屏廉靜自持奉
客無兼味行邊布袍氈帽如行伍卒于官私囊僅足以
歛薊爲立祠三人並起列校爲方鎮而皆屬衛職又相
繼鎮薊前志稱之

國朝

王可就字向明灤州人以將材任山東撫標遊擊勦巨盜
王進周撥宣等又撫賊張正等數萬人以功陞延安府
叅將值逆賊謝化奇等作亂設計勦平陞慶陽府東協

副將閣部洪經畧題調恢復雲貴鎮守偏橋其地有諸
葛洞者江中多怪石舟楫不能通軍需皆民丁負運因
召父老叩狀僉曰中有巨石高數丈石下有洞識云若
要此洞開除非諸葛來自昔畏難輒止就慨然力任募
石工勇慧者親爲經理巨石下得一碣有丁口京邊九
十公之語乃武侯筆隱就名于中衆皆踴躍數旬成功
土人勒石記之以功陞杭州城守副將先是杭多猾賊
賄通當道不肖者復左袒賊就與賊唐起凡戰敗之兵
道某反謂誤入平民爲盜因與抗論事白督撫遂專任
就起凡密遣賄說就不出戰願代爲黃緣得總戎就怒

日逆賊視我爲何如人哉誓必滅此朝食于是元旦會
兵圍其岩親登手刃之餘黨降起凡兵稱百萬爲杭害
者幾二十年至是始平

上嘉其功加陞榮祿大夫署都督同知賜蟒玉封三代任杭
時總督被江賊劫所佩刀急召與議就獻策阻塞沿江
便路置塘戍守率兵嚴捕江賊遂平尋陞福建副總兵
以都督同知署總督標下中營事詣闕陛見

上親臨試射授雲南臨元澂江等處總兵官時吳逆變作復
召見賜綵緞二表裏且諭曰可速回閩密察耿藩恐效尤吳
逆也遂星馳踰仙霞嶺尙不知耿逆之變逆密遣四僞

官要于途日夜嚴防不容死旣至圖乘間誅逆謀洩迫
趨都尉府度不能免仰天嘆曰大丈夫不能爲國除賊
夫復何言舉家號泣隨之不顧遂遇害年六十二

上憫其忠賜祭廕二子長應麟任榮昌令次應薦性至孝以
母老不仕居鄉任義周恤于就歿後四年卒

楊文魁號近樓永平衛人國初以副將從征宣力屢立
戰功擢工部左侍郎凡條議時務精練豁達前奉差監
修奉天諸

陵寢樓櫓橋梁暨寺塔大砲諸工勞績懋著

穆廷杖字符公山海衛人康熙丁未武進士初任蔚州守

備陞四川提標遊擊整飭營伍愛恤士卒擢威茂營叅將永寧協副將蘇松水師總兵頻邀

聖眷仕至福建提督加左都督卒

賜諡清恪公性謙和操守謹慎綽有古儒將風子秉常仕至雲南漢水總兵

齊大勇字養浩號鳳崑昌黎人幼穎異通書史素負大志年二十遊文庠應鄉試不第乃棄文就武爲武生雍正巳酉應武鄉試不第大學士公馬齊素知勇膂力過人弓馬純熟兼長文事乃爲之稱屈竟徹

宸聽

世宗憲皇帝特命與新科武舉在紫光閣一體考試

欽賜武舉明年會試

殿試俱第一授乾清門頭等侍衛一時名噪都下九年三月奉

旨往軍營隨大將軍岳鍾琪學習行走

賜孔雀翎盔甲衣服等物又解

御佩小荷包賜之曰好生學習勿負朕意勇感激

聖恩馳赴巴里坤大將軍派領戎纛兵馬進勦六次奮往爭先屢著功績西酋聞之心慄十三年題補山西撫標中軍叅將洎晉數載整飭戎行練習營務乾隆七年

特陞湖南沅州協副將抵任五月丁父艱回籍服闋補江
南鎮海將軍中軍副將十二年正月補授湖廣襄陽鎮
總兵旋于九月調陝西興安鎮總兵十三年十一月奉
旨派領西安固原延綏河州興漢五鎮官兵進勦金川十
四年六月陞授湖廣提督十六年調陝西固原提督又
調甘肅提督仍移固原提督十一月入

覲屢蒙

召見謂諸王大臣曰齊大勇乃

先皇舊臣洵狀元中之傑出者面奉

諭旨仍在乾清門行走十二月

陞辭回任二十三年十二月奉

旨調補湖廣提督嗣以固原提督任內保舉不稱以叅將
銜發往巴里坤効力行走凡四年敘列一等選授河南
河南營叅將以母喪致疾葬甫畢而歿卒年六十有六
勇服官三十載廉潔自矢區畫軍務鉅細精詳兵民愛
之如父母去之日靡不流涕道左勒石以誌不忘其孝
友出於天性兩丁內外艱哀毀逾節至於滅性鄉黨爲
之流涕與人交披肝膽無粉飾工書法於舊榻名筆尤
精鑒別兩遇

覃恩晉封資政大夫榮祿大夫

永平府志卷之十八

人物志 四

忠烈

唐

陽惠元平州人以趨勇奮事平盧軍從田神功李忠臣浮海入青州詔以兵隸神策為京西兵馬使鎮奉天德宗初立稍繩諸節度跋扈者於是李正已屯曹州田悅增河上兵河南大擾詔移兵萬二千戍關東帝御望春樓誓師因勞遣諸將酒至神策將士不敢飲帝問故惠元曰初發奉天臣之帥張巨濟與眾約是役也不立功毋

飲酒臣不敢食其言既行有饋於道惟惠元軍叛豐不
發帝咨歎不已璽書慰勞俄以兵三千會諸將擊田悅
戰御河奪三橋惠元功多以兵屬李懷光及朱泚反自
河朔赴難解奉天圍加檢校工部尚書攝貝州刺史詔
惠元與神策行營節度使李晟鄜坊節度使李建徽及
懷光聯營便橋晟知懷光且叛移屯東渭橋翰林學士
陸贄諫帝曰四將接壘晟等兵寡位下爲懷光所易勢
不兩完晟旣慮變請與惠元東徙則建徽孤立宜因晟
行合兩軍皆往以備賊爲解趣裝進道則懷光計無所
施帝不從使神策將李昇往伺還奏懷光反明甚是夕
奪二軍惠元建徽走奉天懷光遣將冉宗馳騎追及于
好畤惠元被髮呼天血流出皆袒裼戰而死二子晟嵩
匿井中皆及害建徽獨免詔贈惠元尚書左僕射晟殿
中監嵩邠州刺史少子旻字公素惠元之死被八創墮
別井或救得免歷邢州刺史盧從史旣縛潞軍潰有驍
卒五千從史嘗以子視者奔于旻旻閉城不內衆皆哭
曰奴失帥今公有完城又度支錢百萬在府少賜之爲
表天子求旌節旻開諭禍福遣之衆感悟遂還軍憲宗
嘉之遷易州刺史王師討吳元濟以唐州刺史提兵深
入二百里薄申州拔外郭殘其垣以功加御史中丞容

州西原蠻反授本州經畧招討使擊定之進御史大夫
合邕容兩管爲一道卒贈左散騎常侍

唐書

元

周宏字希道遷安人尹真定無極調遼陽寧昌俱有惠政
至正間調昌黎撫字有方利澤及人平章程思忠亂據
永平宏率民拒守城陷被執宏七日不食罵不絕口而
死崇祀鄉賢

明

高德撫寧人洪武初歸附從征累立戰功除授副千戶十
四年奉調征雲南金齒衛等處所至奏績十五年八月

進攻阿白寨奮擊力戰死之及雲南平事聞詔封明威
將軍都指揮使世襲指揮僉事

李光啟樂亭人其先李卜當洪武間戍陝西平魯衛後有
功陞百戶世襲光啟性忠孝有才幹累陞京營都指揮
使贈其先爲鎮國將軍歸祭先塋爲樹碑給族人衣陞
宣鎮葛峪叅將嘉靖丙戌敵數突入侵苦居人啟憤焉
一日警至率所部兵疾馳圖殲之未及爲陣敵四至大
呼殺入啟被縛引去困飢不得死因給敵曰我爲帥第
引我亭障下當有贖者敵果引至亭障下啟罵曰爾宜
殺我我非不肯死慮中國人疑我真降爾徒負辱國大

罪幸毋贖我敵大怒遂支解之事聞詔立祠春秋祀焉
見宣鎮忠烈傳

周建撫寧衛指揮僉事成化十六年管界嶺駐操營事三
月鹵入寇叅將王宣督令截殺至白石店奪回被擄人
畜燒敵車輛回至椴木嶺伏賊突出前賊復回夾攻戰
衄賊欲取建甲衣喝令脫不從猶以刀傷賊臂羣怒爭
刃之事聞詔加寔授指揮同知世襲
才寬遷安人登成化戊戌進士由縣令歷郎署太守方伯
都憲轉工部侍郎以不附閹瑾出爲陝西總制加工部
尚書軍法甚嚴部將怯懦輒以巾幗恥之臨陣躬親督

戰奮不顧身遂遇害上爲輟朝哀悼諭祭贈太子少保
諡襄愍仍廕子世襲錦衣衛百戶崇祀鄉賢

張世忠字顯甫別號平山山海衛副千戶忠貌不逾中人
而神爽英發總髮時以世胄襲職嘉靖丙戌會武試登
孫堪榜加授署指揮僉事尋掌衛篆遷秩守備天壽山
歷陞大同中路叅將嚴整步伍數立戰功調援有奇捷
得實授正千戶緣邊事窒誤聽勘回籍未幾西郵告急
本兵疏名上請特命移守偏頭關頻年失利人爲忠危
之忠躍然曰此吾報國之秋也嘉靖二十一年太原警
忠與諸將分五哨進歆盟互援適遇敵于六支村忠麾

下健卒僅千人挺身血戰自己至酉矢石俱盡後援不
至敵且增輕騎合圍射忠中額尋殪其馬忠猶跨墻對
射矢透忠衣袖死之事聞賜祭塋贈右都督諡忠愍
陳舜撫寧衛指揮使任黃花鎮守備嘉靖二十五年三月
敵入寇舜奮身率輕騎持短兵截戰敵衆我寡死之事
聞詔加都指揮僉事

魏琦遷安庠生嘉靖三十六年兵變琦率鄉人保守兵至
琦手刃二人既而衆兵羣合遂被執琦罵不絕口而死
當事大加嘆異命有司周恤給葬焉

湯呈芳字桂林山海衛人由恩貢授魯山令丰容偉幹居

官平易時土寇蜂起與衙胥結通芳知事不克濟冠帶
坐堂上賊環侍不忍加害出入數四始戕之爲具棺斂
停喪後其弟往收其屍經年啟視面貌如生事聞贈汝

州知州

縣志

薛三桂盧龍人萬歷庚子舉人雲南永寧州知州遭奢囚
之變死難贈按察僉事

縣志

李國梁山海衛指揮體貌豐偉膂力絕倫從杜將軍松渾
河大戰没于陣以功加陞都督指揮僉事

高如崧東勝衛千戶萬歷中任石門路千總時泰寧寇花
場峪佯令數騎討戰主將輕出敵伏起陷圍如崧奮勇

力鬪出入陣中者三敵攢射落馬剖其心而死事聞贈
加二級世襲指揮同知

李國棟山海衛指揮體貌豐偉膂力絕倫萬歷間從杜將
軍松出塞與我

大清兵渾河大戰沒于陣以功贈都指揮僉事子鳴崗襲
廕

邊萬里山海衛百戶以都司管中軍事崇正己巳入衛京
師行至薊州五里橋敵兵掩至據橋大戰自未至酉身
被重創力戰死

焦慶延盧龍衛人由世胄任居浦叅將操守廉介居官嘗
買田自給事母極盡孝道兵備道張公春恒稱之曰武
將若慶延何愁不得將士心耶歷任三屯副總兵稱廉
孝將軍崇正庚午慶延閒住適敵至戰死俾間贈光祿
大夫驃騎將軍勅祀武廟表忠祠

韓原洞字開之少爲諸生詩文有奇氣當郊原多故嘗慷
慨悲歌慕古人以身殉國之義崇正庚午力捍危城出
金犒師知不可支乃爲忠國論置懷中赴鬪而死事聞

祠祀

張國翰東勝左衛指揮僉事歷任營衛有聲庚午敵陷府
城從容酌酒俾其子逃生同妻韓氏縊死詔建祠旌表

卷之八
廖汝欽盧龍人中書舍人庚午之變汝欽守奎樓死之勅
祀表忠祠

楊爾俊盧龍人汝寧通判庚午城陷不屈遇害勅祀表忠
祠

陳靖華東勝衛指揮掌永平衛印興屯利國撫綏有方庚
午守東城死於難長子君錫由貢生任淮安睢寧縣知
縣次子君任陝西總督內司遊擊

牛星耀伏耀光並盧龍人英勇過人弓馬熟嫻爲忠武營
千總庚午之變殺敵甚多俱陣亡
石可玩盧龍人時爲千總庚午城陷閉門闔室自焚

周祚新永平庠生庚午城陷視妻與子女等先縊乃自縊
死遺火焚宅

胡承祚張學閔皆盧龍人庚午爲城千總城陷戰死堞間
胡登龍盧龍人庚午城破登龍義不求生攜子生員光奎
暨闔門男婦俱投火中而死

羅世傑永平生員庚午之變有弟三人曰堦曰塚曰圻一
人守家三人守城城陷皆死於戰守家者亦自殺

田種玉子福元皆盧龍庠生庚午城陷闔室自焚其侄士
儁城將陷赴戰死於東城上

馮繼京永平庠生端方厚重能詩文善騎射稱文武才庚

午城陷自縊人救免之叱曰偷生吾不忍爲夜復縊而
死弟聯京短小精悍守城有膽氣戒衆勿退及持戟衝
敵連刺三人因大隊先登死于俾間兄弟並祀表忠祠
卜小峯城守千總庚午之變戰死

梁壯威盧龍人千總庚午城陷人勸之去壯威曰守死于
此吾事也何去爲奮勇臨敵射不虛發會矢盡持短兵
接戰死亂兵中祀表忠祠

房應祥城守中軍庚午督鄉兵巡城城陷血戰而死

李光春丁應掄李文燦胡起鴻劉可足皆盧龍庠生及武
生張鴻鸞醫官陸橘郡民李應陽張俊郭重光張宗仁

張禮李大敬張尙義傅守望俱死於庚午之變

以上盧龍縣志

韓原性盧龍廩生有學行喜獎拔後進千里之內負笈從
遊者甚衆庚午守榛子鎮不屈死

呂鳴雲山海衛人孝廉鳴夏之弟武健材勇以守備爲揚
武營中軍庚午守郡城戰死追贈遊擊將軍
楊開泰山海衛百戶郡城失守泰以本路把總率兵偵探
至榆關西遇敵對射死之

楊廷棟山海衛百戶少以勇力稱爲揚武營千總郡城破
奮擊死之

張汝恭灤州廩生庚午州城陷死難祀表忠祠

高應見遷安人庚午兵變飲毒而死督撫章題旌表

蔡國勳山海衛千戶率兵恢復遵化偵探遇敵奮勇直前
戰歿于陣閣部孫承宗題卹贈指揮僉事

嚴大寬山海衛千戶從總兵趙率教應援遵化中途遇敵
衆潰大寬力戰不退死之

周昌會李崇樂張三張守霜劉極楊狗子鄭應秋邱小月
洪保兒馬九哥孟之奎張福兒孫鳴海于守道趙世祥

高聲駿卜云吉郭來貴張友貴鍾五兒翟三龔自學李
蕃枝單應武朱可昌梁民樂于守通梁世文王六兒劉

君福孫三孫來哥王國臣李思謙張六指郭得哥王大

才王六周德純齊福拽梯郎君失其姓名並昌黎人崇

正庚午守城死事巡撫楊嗣昌檄縣刊石豎碑有司春
秋致祭今祀於忠義祠

王肇桓興州衛人中軍都督府都督同知崇正末年遭寇
亂合門墜井死

馮運隆字翊明灤州人由明經任河間訓導壬午冬流寇
至隆守陴力戰城陷不屈死

王際明撫寧人秉性剛直言行不苟由明經任清河學博
陞沔縣令未半月遭寇襲城士民驚散明執鐵鎗率家

人對敵賊多有中傷者明爲亂矢所困猶血戰不屈賊

天平府志 卷之十一 九
懼乃却尋復挾忿糾黨嚴攻七月不下積勞成疾告休
還里路經臨清之變誓不倖生登樓自焚山左撫按交
章入告部覆方下闖賊陷京未沾卹典

王之心字鑑吾灤州人司禮監太監博學精翰墨監督薊
永力杜餽遺免文吏庭謁崇正甲申都城陷心同御馬
監太監王承恩侍帝縊于煤山一時稱兩中貴殉義心
弟之仁任蘇州總兵順治二年率所部入海見事不成
復登岸詣督師洪公請死曰某海中自裁人未我知特
來求明白死耳從容就刑可謂兄弟合節矣

程繼賢號敬庵山海衛人由貢監初授中書舍人歷尙寶
司卿封朝議大夫賢事親不諉諸兄父百歲具奏建坊
完兄產撫兄子時以孝弟稱且敦篤友誼生死不渝請
除催頭之弊功在梓里年踰七旬居鄉謙抑甲申守官
都門不臣逆闖捶幾死僑寓天津土寇忽起賢獨不屈
竟遇害

國朝順治庚子本衛士民公請入祀鄉賢

李友松字赤仙山海衛庠生性剛毅有學識崇正甲申春
流寇薄城勢甚危急松慷慨倡義率庠生高輪轂譚邃
寰劉泰臨鄉耆劉臺山黃鎮菴赴營說賊緩軍遂遇害
然城卒賴以完

國朝錄功廕子棲鳳爲貴州思州府經歷

縣志

國朝

呂鳴夏字九三山海衛人明萬歷乙卯舉人天性孝友弟
鳴雲歿於王事遺孤幼稚撫訓成立輿論重之初仕清
豐教諭繼補束鹿訓課有方陞真定郡丞分駐宣鎮以
抗直取忤掛冠歸里明末賊逼關門夏家居佐義殲寇
我

朝定鼎錄功補衛輝郡守時天下初定撫安百姓政績稱
最擢僉憲備兵固原值降將武大定等謀叛以兵脅夏
不少屈歷數其罪罵不絕口遂遇害事聞

勅賜祭葬贈光祿卿廕入祀鄉賢

馬維熙字天御山海衛人拔貢生順治三年錄功授忻州
同知署偏關西糧廳篆值姜瓖之變山右一帶搖動偏
關闔城皆從逆公獨不屈乃囚公別所遣人守伺久之
守義愈堅遂加害事聞贈忻州知州
張師聖遷安人讀書善騎射以將才任金吾守備陞靖海
叅將簡練軍士整飭防汛數年海上肅清順治中陞山
東登州副總兵未離任海寇旋發督撫令將兵進討沒
于陣

詔廕卹

劉良臣字心伯永平衛世襲以軍功授遊擊勦平流寇歷
陞甘肅總兵掛平羌將軍印卒於陣贈右都督進光祿
大夫子澤洪總兵襲廕

崔尙樸盧龍庠生被俘至遼改姓名李嘉賓應試復入庠
國初授新蔡令清廉慈愛邑人尸祝之陞南康郡守遇
金王之變鳩衆堅守城守備內叛遂被執罵賊求死不
得偕配吳氏投繯死事定議贈廕惜無子
陳柱國盧龍人康熙十一年任樂亭駐防把總盜伺縣尹
公出詐爲行客入城肆劫柱國挺身與鬪中流矢被獲
縛令導引柱國裂眦厲罵遂遇害事聞

詔賜銀百兩襄葬事

張朝臣字鼎望山海衛人武進士任浙江處州協都司康
熙四十七年遂昌縣土賊作亂臣率兵赴勦至大拓崖
高路窄僅容一騎臣不避危險奮勇身先殺賊被創死
事聞

詔贈都司僉事加一級賜祭葬廕一子衛千總

孝義

遼

齊陶馬城人天性純孝孚于閭里壽昌間徵授石城令遷

明威將軍

金

吉士寬尹吉甫裔也南漢太守格之後五代徙居灤州宜安里事親最孝富而好施贈昭勇大將軍

葛宏灤州人金末歲饑竭力贍卹全活數百人元辟為石

城縣尹

元

龐遵盧龍人母病三年不能起思食魚遵求於市不得悲

嘆而歸忽有魚躍入舟中作羹以獻母食而病痊

縣志

李彥忠盧龍人性至孝父喪廬墓八年足跡不至於家至

治中旌表

按舊志及盧龍縣志並作至治中旌畿輔志作宏治

中恐誤

任伯仁灤州人南麓六世孫讓產於弟伯義伯禮孝友出

至性元貞中授銀符進義副尉武魏親軍百夫長

路進興字通舉灤州人大德間隨伯顏破賊不避矢石累

獲大功受勅牒印綬賜敦武校尉辭歸奉母務盡菽水

之歡母卒餽粥編素哀毀踰禮鄉人以孝稱焉

明

韓孝子舊志失名樂亭人居鄉廉讓與人無競竭力以奉

親洪武間題旌

縣志

姚清徐俊石敬俱樂亭人景泰三年灤水暴漲歲饑民多
流亡各捐粟八百石助賑事聞詔旌所居曰尚義之門
雜志

宋會董全周清楊玘俱遷安人景泰三年歲大饑各出粟
八百石以助賑詔旌表其閭立尚義坊 縣志

馬麟呂信俱盧龍人景泰三年各輸粟八百石賑濟詔旌
其門

高信與方震俱昌黎人景泰三年各出粟八百石賑饑有
詔旌表其門立尚義坊

許敬撫寧人景泰三年出粟八百石賑饑事聞詔旌其門

立尚義坊

翟昊撫寧人天性溫厚與物恂恂人有侮者受而不報遇
顛連疾苦者常解衣推食以周之祀鄉賢

田紳樂亭人庠生景泰初以親老陳情于督學使者求侍
養父歿哀毀踰禮既葬自跣足負土母終亦如之封土
巋然可望數里有司請旌未果

馮欽字師堯其先浙江海鹽人祖寧明初遷灤爲歲貢任
范縣主簿清勵至無以歸生子源授忠義官欽茂穎強
記弱冠餼于庠就例遊太學交四方雲彥推解以急友
朋正德中仕京衛經歷見逆瑾肆虐解組歸人以爲知

幾源訓子常曰富者怨之府人已嫉之從而驕人事端起矣欽能守父戒故推誠施與閭里被其澤焉

王天相撫寧人好施樂善不遺餘力本縣扁旌其門曰泉石幽貞

馮守業撫寧人尙義樂施常捐貲活貧輸粟救荒士夫高其行誼

楊念撫寧人治家嚴肅一門雍睦七代不分本縣扁旌曰七世同居

麴祥字景德永平人永樂中父亮爲金山衛百戶祥年十四被倭掠國王知爲中國人召侍左右改名元貴遂仕

其國有妻子然心未嘗一日忘中國也屢諷王入貢宣德中與使臣偕來上疏言臣夙遭俘掠抱釁痛心流離困頓艱苦萬狀今獲生還中國夫豈由人伏乞賜歸侍養不勝至願天子方懷柔遠人不從其請但許給驛暫歸仍還本國祥抵家獨其母在不能識曰果吾兒則耳陰有赤痣驗之信抱持痛哭未幾別去至日本啟以帝意國王允之仍令入貢祥乃復申前請詔許襲職歸養母子相失二十年又有華夷之限竟得遂其初志聞者異之

明史

楊珍撫寧人克供子職母早逝事父惟謹侍食侍寢無怠

內外咸以孝子呼之父疾篤醫藥罔效口嘗其便知不能起遂治後事如禮及葬廬于墓側負土築墳三年乃歸

金鏞撫寧庠生父禧早逝母高氏守志撫孤凜松栢操鏞性孝負米採薪勤于供養母恙卽憂見于色焚香祝天願以身代進食必先嘗其寒熱雖貧嘗奮志讀書由恩選官光祿寺署正乞歸終養母節子孝萃于一門

朱輝盧龍庠生母程氏亡晝夜號泣哀毀骨立廬墓負土成塚及期白狼馴擾不去有燕來巢穀雙岐之異撫院給近墳山場環五里許官爲植樹成化甲辰題旌以歲

貢爲任邱訓導

吳思文灤州人輸粟救荒成化五年詔賜七品散官

王信撫寧衛人進士王邸祥之祖也成化七年大飢出粟八百石賑濟

李福灤州人于成化七年爲義墓凡不能墓者舉之

徐禮灤州人成化間隆冬時施衣每歲行之不倦人懷其惠

王淵盧龍人幼喪父其母陳氏守節至七十餘卒淵廬墓三年日三坏土高塚巋然在望

朱國賢宋德詔蕭大用俱盧龍人親喪廬墓三年有司獎

之

李士傑興州衛人爲諸生時聘陳氏女女後失明或勸其更聘傑竟娶之人欽其義宏治中登賢書

馮恩昌黎人仕州同律已廉明娶里人郭姓女自幼目瞽誓不更娶鄉里賢之

安民字修已灤州人宏治己酉舉人授兵部司務歷戶部郎中引疾乞休加四品服色歸初父和尹大同卒于官民幼扶櫬還事母周氏曲盡權愉母卒廬于墓慟毀三年未嘗近帷室鄉人稱孝焉

劉甫樂亭人自明初至宏治間六世同居凡內外婚葬禮儀必均俱無後言己未巡按御史張黼嘉其賢命知縣田登旌其廬

張雲鵬山海衛人父病夜不假寐湯藥親嘗父歿敦古禮廬墓三年

趙文舉山海衛人幼極孝母患疽痛不可忍醫皆云不治舉虔禱于天母獲痊家素窘居常奉母卽富者不能過云

王臣樂亭人父茂有孝行臣善楷書郡辟爲從事有罪人通路求道臣指天自誓郡守賢之每疑獄輒召與議能白人冤亡何奉母柩歸里山水暴至舟幾覆臣撫柩悲

號竟無患若神助焉有客懷二十金欲糴粟入市遺金
哭之悲臣憐助之年四十七未舉子往禱泰山夢神告
曰以吾二子與爾踰年生太守好學又三年生尙書好
問若與夢符以二子貴累贈至南京戶部尙書

蕭富樂亭人少孤事母孝母卒富供王事不在側歸而痛
極嘔血終身言及淚泣泣下以祖居讓伯仲而自居他
所嘗爲府吏廉而有陰德旣歸省卽隱不仕嘉靖丁酉
大饑鄉人求貸乃轉貸之負累代償絕不掛齒其重義
輕利類如此始艱嗣後連舉四子長雲漢博學工古文
詞貢遊太學授大同通判累薦考最陞河東運同致仕

歸贈富如其官

劉會灤州人嘉靖十六年輸粟一千石賑饑

高漢樂亭人六世同居嘉靖十六年知府劉隅獎之

王榮遷安人由明經任榆林訓導未幾乞休居鄉友睦嘗
買人田人不忍舍輒毀券無難色

高玉灤州人貲頗富嘉靖二十五年施義田并糧二千石
以周貧乏

陳慎灤州人孝義令陳情弟事母至孝營漏澤園共施地
六畝于福君廟東北里許

溫欽樂亭人性篤實與人無競非公罕至城市貧而樂善

卷之十八
卓有古人風年至百有餘歲嘉靖間匾其名於旌善亭
蕭韶鳳山海衛人年十九父病蠱迎醫視之曰得樟柳木
根可愈城中求之不獲或告以產於海陽時石河水暴
漲不可渡韶直前往覓家人止之泣曰父病篤阻水而
止於心忍乎竟涉至中流溺死三日尸浮於海君子重
其孝而哀其愚

張懋勛山海衛人都督世忠子也痛父歿於王事每語及
輒流涕事孀母三十餘年孝養備至母卒哀毀骨立廬
墓如禮

馮恩孚樂亭人歲貢事親稱孝曲爲承順有老萊風母性
嚴刻孚畧不違意待人謙和無忤未仕卒

王永昌樂亭人家富好施能周人急鄉人稱貸有以田廬
爲質多負而私轉鬻昌不與競又嘗捐地爲義塚其轉
粟輸金輸工役以佐公家者不勝紀

張自鎬樂亭人歲貢性謹厚事親最孝母多任性鎬每幾
諫久亦感悟鄉人稱焉

侯顯昌黎人國學生尙氣節敦朴素父母雙亡俱廬墓側
鳩巢于舍芝生于塚

孫渤昌黎人幼喪父事母最孝母死廬墓哀毀如禮
傅夢良山海庠生性純篤事母孝母歿哀毀骨立旣葬廬

墓側秋夏霖雨累日廬中水盈尺不爲動

王尙賢昌黎人行人翰之子性孝友堂弟郎中尙直之嗣以次孫承祧而不利其產居鄉恂恂仁恕因號恕齋由明經知富平縣有名及歸囊橐蕭然不異寒素孫之屏登萬歷辛卯鄉薦

馮餘慶灤州人由明經授西華令一塵不染捐貲千金建長橋于治郭以利涉歸施義田用濟貧族以孫運泰貴贈同卿

石璞灤州人賦性醇厚立心寬和人有急難多方周恤而毫無德色推誠布公不吝不爭每以棲畝之餘割共隣

族牛豕犯田者飽飼歸之詩書以訓後昆有先民矩矱焉以子維嶽貴贈中憲大夫孫申貴晉贈通議大夫少冢宰

楊騰遷安人爲諸生幼孤母病日以舌舐之而愈及沒廬墓三年有冰花結於盆儼如樹下人拜伏墳前之象已而芝草生焉隆慶中上聞詔立純孝格天華表于通衢仍給冠帶榮之

畿輔志

劉文煥字世英樂亭人幼孤事母至孝妻盧氏亦孝於姑姑病額天請代冬著單衣者三年病果痊及姑歿欲廬墓文煥止之曰此爲子事也自廬墓三年每日覆土者

三墳可望數里嘗鑿井於墓旁汲以自爨不數尺泉水

湧出人號為孝泉云 縣志

蔣盛遷安人廬父墓三年詔旌表其閭

韓瑛遷安人廬母墓三年日哀痛覆土三次母墓成邱深

山獨處有虎衛之冬產瑞芝詔立孝感坊

郭純學撫寧人樂善好施明萬歷間值歲荒捐米賑饑本

縣旌其門

王華遷安人銳曾孫隆慶中輸磚十萬灰五萬修縣東城

萬歷十五年大饑出粟八百石助賑詔立尚義坊

高吉昌字介幾灤州人貢生少負異穎目下數行生平喜

駿馬善方罽射獵之藝重然諾通緩急賑凶荒累世之

積盡公于鄉族有文正父子之風以子貴贈資政大夫

兵部尚書

王克勤灤州庠生事繼母以孝聞萬歷十三年學按兩獎

其間

穆思文山海庠生事繼母盡孝有二弟俱繼母出財產必

均後二弟家窘又為弟之子給產婚娶督學汪公應元

疏請建孝義坊

王士侗山海庠生敦樸謹慎天性孝友父從政知山東萊

陽縣以持正忤當事被誣繫獄侗偕弟偉搥登聞鼓劾

頸力救卒白父寃

任白永遷安人三歲孤母郭氏孀居撫永成立永幼事母以孝聞及沒哀毀踰禮既殯廬于墓朝夕哭奠三年如一日

楊有成撫寧庠生八歲喪父已知哀毀及母有疾湯藥親奉卒之日漿水不入口及葬廬墓側茹蔬啜粥負土築墳日三哭奠歷寒暑不輟卽邊警亦不少動舊有枯松復活禽鳥棲巢于上人皆謂純孝所致

袁卉撫寧人素敦孝行母蚤逝及父歿廬于墓側三年蛇馴蓐次地忽湧泉共稱孝感

高向辰字欽隣第長子廩生事繼母許夫人竭哀盡誠扶櫬步行百里友愛諸弟若不知爲異母者推誠任俠助友至數百金不惜年四十二卒里人罷春名士會葬者不遠數百里而至世家子弟稱最賢而文者

崔赴闈字名臚盧龍人庠生博學善屬文小試屢冠軍以軀幹豐偉號舍不能容遂絕意仕進性好周卹尤愛惜文士族孫及第家貧力學赴闈閱其文許必售資助應試且予粟二石曰速釀酒以宴賀客果登鄉薦乙丑捷南宮兄之孫啟亨少孤收養之爲擇師教訓是歲亦列賢書遷安郭輩甚貧衣履弗完延之家給衣食且授以

成宏正法鞏遂早捷由給諫晉少司馬嘗予告歸來謁
留之飯粗糲不異昔時鞏歡然語人曰吾師以古人待
我矣因乏嗣子弟之子然弗材是時年已古稀又病足
痿羣肩輿逆致其家察精神猶健勸納繼室笑曰世豈
有七十翁壻人者乎不許然鞏已密聘王氏室女至期
大驚辭之不能遂合卺焉生子魏及卒時魏甫六歲
穆大任山海庠生至性純篤父蚤逝事母以孝聞母歿躬
廬墓側值兵變鄉人居村落者皆入城避亂大任獨守
墓不忍去

鄭中選字佐明始祖甫智以御史直諫謫灤州因著籍焉
天性純孝不冠幘弗敢見父母遭喪哀毀盡禮以孝誼
徵辟遷文登令清介自矢士民繪屏尸祝失上官意罷
歸居鄉力行善事至今稱之

蔣盛韓瑛楊騰俱遷安庠生各以廬墓奉旌

張廷佐遷安庠生性至孝父疾不解衣帶者五旬餘又失
明佐禱神以舌舐之愈及歿夜依柩側風雨不避奉母
終身孝養彌至

孫國賢撫寧人以廬墓奉旌

高應辰字欽明尙書第仲子不敢以貴介忤物讀書莫測
其蘊以官生任戶部照磨督犒援兵城下椎牛割羊乾

餽芻菱一手拮据勞瘁骨立值父喪痛躄奔赴遠塋嘔血數升三月而卒鄉里哀之

徐應登字子科撫寧人敦行孝友不昧孤姪遺金鄉黨推重以明經授真定廣文教人先德行而後文藝弟子佩服不諼

國朝

夏曰瑚灤州庠生父輔明于崇正九年隨叔建中之扶風縣佐任死于流寇家人負骸骨歸瑚甫五歲賴母聶氏苦節撫訓遊庠自幼事母曲盡孝道母病密爲嘗糞及歿哀毀逾常七日不食竭蹶殯葬廬于墓側日夜哭泣

哀感行路及三年歸猶日三至墓呼母不應號泣反至老病必扶策往雖風雨無間

劉光裕號小峯遷安人居鄉樂施尙義慈愛謙恭撫孤姪嫁族女助喪賑饑盛德積累鄉人號之曰劉佛以子鴻儒貴贈兵部右侍郎入祀鄉賢

張宗仕灤州人幼失怙事母盡孝及長喜讀孫吳書任俠好施明崇正時從兵備張春軍中屢戰有奇功授明威將軍順治壬辰癸巳間歲頻饑兩次輸粟一千八百石有奇賑濟賴全活者無筭郡守旌其門曰惠溥一方舉鄉賓又嘗捐渡船二隻水手四人置青沱河口以濟行

人遠近咸感其德子起鯉任河防州同孫瑛食餼州庠
孝慈接武咸謂積德之遺云

韓坤業字子厚府庠生父原潔崇正庚午歿于兵燹母王
氏苦節四十年撫坤成立自幼事母盡孝內外無間言
母歿廬墓三年哀感行路日手抔土高塚巍然康熙九
年題旌建坊

崔聯芳字子宗山海衛人父出遊五年不歸順治丙戌應
順天鄉試榜未發聞父凶信不知死所日夜號哭幾不
欲生比揭曉已膺鄉薦不顧歷四省尋屍若有神示於
河南確山縣得之負骨歸葬咸稱爲誠孝所感兩經部

選高隱不仕年八十卒

趙天錫昌黎人順治辛卯舉人事祖母至孝二親病卧三
十餘年躬侍湯藥始終無倦康熙五十三年祀鄉賢

志

畿輔

趙名元撫寧庠生母卒廬于墓側晨昏哭奠三年始歸康
熙二十年奉旌

劉從性撫寧人性至孝母年八十二卧病不起性割股禱
神病遂愈

徐從新撫寧庠生母性嚴從新恪恭承順生平任俠急公
人服其義本縣扁旌其門

徐進孝撫寧人父患心疾貧不能延醫禱神許愿疾愈愿
莫償疾復作進孝割胸前肉如掌禱還神愿疾竟瘳以
肉掛廟樹上經數月不腐鷹鳥亦不忍食咸謂至孝所
感有司表其閭

馮泰運字熙軒撫寧人由貢士任溧水令吏治精敏嘗捐
貲二百餘金助修撫寧學宮并製銅冶祭器以肅陳薦
若爐若瓶磬若劍若勺與夫籩豆簠簋尊爵之屬共二
百四十二件云

遲震起字茂先昌黎人少食貧事親以孝聞居喪哀毀骨
立後入太學不樂仕進生平謙和樂善無疾言遽色宗

黨咸以長者稱之子二長日旭爲浙江浦江令嗣宰湖

廣黃梅起以子貴 勅封文林郎次日昶歲貢生

王監字于隰灤州人性嚴重不苟嘖笑生平重然諾樂獎
後進而尤敦族誼凡婚喪藥餌棺物及急難事施濟難
更僕數于孝義節烈更加意曲成與人交不以死生變
易年八十卒進士汪公淑問爲著考終錄事甚悉子四
伯仲早世次代出繼季遂功府庠生

張應宿昌黎貢生長沙郡守翰宸公子性慷慨重然諾恤
貧周急毫無德色舉鄉飲

徐進禮字天一山海衛人賦性醇樸少貧以勤儉力自振

興與人交忠信和易尤篤友愛兩弟早世遺孤穉齡撫翼教誨二十餘年同居無間年及七旬未嘗一至公庭有古君子風

馬德盛樂亭人販茶爲生有至性居家孝友奉嗣母甚謹母病盛在外聞之夜行百五十里抵家親調湯藥事兄如事父每事必稟而後行雖乏財而性喜施嘗赴市拾遺金待其人還之康熙二十六年舉鄉耆

縣志

姚延嗣字振公樂亭庠生天性孝友睦族撫孤多藉成立遇貧乏不能婚葬者周助無德色樂邑學宮頽壞首先倡修殿廡一新生平樂善好義類如此子采以選拔任

國子監學正

贈公如其官康熙二十九年奉文崇祀

鄉賢

劉文選樂亭人有事母不贍計鬻妻以供甘旨者選聞之給以緡米遂不果鬻然劉家計亦非素饒人調鬻妻者不失郭巨之存心給緡者無愧元振之盛誼爲兩難云

樂亭志雜記

謝丕智字若愚山海衛人府庠生事親誠孝母病湯藥親嘗衣不解帶者兩月病轉劇乃焚香虔禱剗股投藥母遂痊康熙三十二年公舉孝行郡守梁公世勲旌其門劉深遷安人孝行純篤父母亡廬墓三年哀痛如初喪邑

宰喬于瀛劉文煥皆給匾旌其門 縣志

宋濯遷安人少孤力耕以事祖母艱辛備歷事繼母曲得歡心竭力供三弟讀書俱入膠庠無異同母 縣志

陳德元遷安人幼孤貧長事祖母最孝祖母有疾率妻張氏晝夜祈禱湯藥必嘗時充行伍古北提督某壯其品授以標下把總元以祖母老辭不就士人賢之 縣志

郭重修遷安人家貧傭工養親菽水承歡康熙四十年其父病篤修顙天祈命願以身代病竟愈且友于性成竭廕供幼弟龍岡讀書入庠鄉人重之 縣志

劉輝遷安人康熙四十一年路拾白金二百兩黃金二十兩訪失金者還之縣令旌其門後舉鄉飲者賓

李毓元字儲英灤州人慷慨尚義一諾千金家設義塾以訓族子歲解私橐以周親知急公排難之舉不可勝紀康熙四十二年出粟一千石賑濟復捐助義倉五百石大學士安溪李公光地撫直時給匾旌其門子楨綽有父風

吳元臣山海衛人性至孝母病危篤醫藥罔效乃焚香叩天剗股投藥中母飲遂痊康熙四十二年公舉孝行有司旌之

田毓琦字瑞生昌黎人性孝友具才幹家貧貿易生計漸

饒事父母養生送死及兄弟子姪衣食婚嫁成身任之
嘗商于薊之上倉時河水氾溢堤將潰琦出貲募夫塞
堤得免水患所保全者不下數千家子永乾中康熙戊
子科舉人

王嗣昌字祖生盧龍庠生九歲失恃賴繼母陳氏撫育昌
事之極盡其孝生平謙厚恬退課子義方子五長珍康
熙丙戌進士仲季俱庠生

李洪燦號培菴其先山後六州人後徙樂亭幼孤能自堅
立爲鄉里望嘗捐金創栗家灣坨石橋里人便之子本
恭性誠篤不欺有人托白金數萬鎰權得浮金數千悉

還之無所利焉遇貧乏能推與不私其財舉鄉飲大賓
本恭子拔幼遊庠序有聲後以父年邁尙行賈濟充間
請代之計應責逋債遇貧不能償者悉還其券至今稱
頌後以子蘭貴各 誥贈如其官 縣志

劉一蛟昌黎人貢生父病衣不解帶者三載事孀母承歡
無間撫孤姪如子族人以貧鬻子女者一蛟爲措價
出二十四口與婚嫁其他賑饑濟乏尤多義舉學以廉
洛爲宗士類無不仰之康熙五十三年祀鄉賢 畿輔志

武天英遷安人監生恭順事兄撫姪如子親友貧者多周
濟之康熙五十五年捐穀百石貯義倉其妻侯氏壽百

歲 縣志

張一躍樂亭人順治間拔貢歷任紹陽萬載開化黃安令擢知黃平州悉有循聲以親老歸性孝友父應登尻下患毒頻死一躍口吮膿血殆盡而愈以兩兄子女多累一弟尚幼悉出已產讓之任紹陽時丁母艱湖撫以一躍撫綏有術欲題請奪情躍叩頭流血哀懇以免康熙五十三年祀鄉賢 畿輔志

王積善正藍旗漢軍監生居樂亭事親孝與人信臨財廉其父廷相任江南鹽城縣丞卒于官積善年方弱冠號泣奔喪扶柩旋里哀毀骨立安厝後廬墓三年本旗保

舉孝廉以母老待養辭不就旋蒙題請 旌表勅建孝

子坊

樂亭志

馬雲爵字龍翔昌黎人康熙乙酉舉人天性孝友甫八歲值母病泣禱於祖先求以身代手足之誼老而彌篤爲人誠慤醇謹寡應酌慎取與樸素自甘人每稱其儉德而性好施與樂善不倦康熙五十四年歲大饑煮粥以食貧者族黨中給升斗者無算嘗有人稱貸百餘金無力還償立焚其券康熙五十八年舉鄉飲大賓

劉元駟昌黎人素性仁厚樂善好施康熙五十五年施粥縣城歷有三月當事旌之五十八年施糧於開平西南

魚朝等莊邑令徐某舉爲鄉飲者賓其子允中允升仰
遵父志於雍正九年施糧於白官營等莊貧民普沾其
惠允中候選經歷允升中乾隆戊午科副榜孫梧彤並
登武科人咸稱爲積善之報

楊爾瑛昌黎人天性淳篤年五歲時其父震成謀生關外
三十餘年杳無音信爾瑛常問其故輒涕泣不止棄家
尋覓潦倒五年忽於三烏拉南關帝廟遇之負歸奉養
邑人稱其孝焉

趙瑯昌黎人歲貢生樂善好施值歲荒捐粟五百石煮粥
賑饑賴以全活者二千餘人府縣旌其門辭弗受

甯咸臨樂亭人幼補弟子員援例入貢性醇謹居鄉樂善
邑南關外木橋歲久將壓邑人議焚以石苦費巨莫舉
咸臨首先倡之費錢四萬緡有奇子克昌善體父志行
仁施義彌有加焉縣志

趙廷傑樂亭人性慷慨周人之急邑有死喪貧不能殮者
施與棺槨三十餘年不怠前郡守縣令皆給額旌之縣志

任正傳字介菴樂亭人世授岐黃術至傳尤精其業任醫
學訓科施藥濟人全活無算尤急公尙義凡邑有棚建
踴躍輸助爲士民先族黨咸矜式之縣志

李興官樂亭人國學生授縣丞職幼失怙恃勤儉起家凡

里中婚葬貧不能舉者求無不應里人德之 縣志

李瑣字舒英樂亭人以優行入貢天性孝友二兄俱早沒

兄嫂及孤姪無倚瑣收養之數十年如一日皆賴成名

雍正三年舉賢良方正以親老不就 縣志

韓世勳樂亭人晉子增廣生飭廉隅端操守教授生徒以

奉甘旨父染疴疾日侍湯藥飲食必親奉三十餘年如

一日積館金以建宗祠族人咸感其德督學吳襄優其

行給匾旌之曰飭躬勵行 縣志

孫昇撫寧人事親至孝父病湯藥親嘗衣不解帶及歿哀

痛幾絕葬後廬墓三年每日親炊哭奠包土築墳鄉黨

稱之雍正二年 旌表 畿輔志

高士瑱臨榆人庠生父凌霄卒時士瑱年已六十廬墓三

年朝夕哭奠孺慕彌篤母吳氏繼卒廬墓亦如之 縣志

李明生臨榆人監生孝友純篤母死廬墓三年雍正十一

年選江南歙縣巡檢司未蒞任卒 縣志

李標生臨榆人府學增生母死廬墓三年 縣志

齊昃昌黎人庠生天性孝友父作極亦庠生雍正間幕遊

西蜀淹留七年杳無音信齊昃日夜悲思乃徒步尋訪

由京師歷山西陝甘至成都始知卒於隣水躄踊哀號

痛不欲生爰至隣水啟柩扶以歸里凡八歷寒暑計程

一萬五千餘里跋涉艱難辛苦萬狀闔邑皆稱其孝

甯瑄樂亭人幼補弟子員行已端方居家孝友族人貧乏

及孤寡無倚者悉賴其鞠養焉又輸義穀以備荒施藥

餌以救人善行可紀乾隆元年恩賜八品冠帶壽八

十七歲終 縣志

孫式仁樂亭人生有至性未彌月喪父四歲喪母仁痛父

母早背每朔望必哭奠於墓側乾隆五年儒學陳成德

請旌孝童 縣志

宓彩遷安人乾隆十二年捐穀四百石貯社倉蒙縣令詳

請題旌榮以七品頂帶

王明發樂亭人為學胥嘗奉差赴府路拾遺金不昧給還

其主 縣志

王啟智盧龍人廬墓三年乾隆十二年督學呂公旌其門

曰孝行可風 縣志

夏正明撫寧人天性孝友總角時即知懷物遺母聞他人

喪親輒為涕泣家素貧不能攻儒業稍長即隨父國祥

營家計備物致敬曲盡菽水歡及父歿哀毀幾絕孝母

益篤母有疾焚香默祝願減已筭以益親既沒盡禮盡

哀殯塋廬墓側朝暮哭奠三年鄉隣扶歸猶哀聲不已

時人以孝稱乾隆二十五年題旌

何之樞盧龍人捐知府銜生平篤親睦族樂善好施捐貲
設立義學延請塾師備膏火以教育寒士歷久不倦諸
生由此入庠者二十餘人又于城北尹家莊置義塚一
區以安游魂于乾隆二十八九年捨粥救飢助紅白
事棺衾粧奩之費閭里德之嗣子有本由武舉捐游擊
銜亦復善承先志奉行不怠

侍孔坐盧龍人文秀之子母王氏見節烈傳母死孔坐廬
墓三年母節子孝鄉里稱之

王留喜遷安人其父母流徙陝西卒于長安縣留喜負骨
歸葬備歷苦辛知縣靳榮藩爲捐俸置田以旌之

隱逸

金

趙質字景道遼相思溫之裔大定末舉進士不第隱居燕
城南教授爲業明昌間章宗遊春水過焉聞絃誦聲幸
其齋舍見壁間所題詩諷詠久之賞其志趣不凡召至
行殿命之官固辭曰臣僻性野逸志在長林豐草金鑣
玉絡非所願也况聖明在上可不容巢由爲外臣乎上
益奇之賜田千畝復之終身泰和二年卒年八十五

金史

明

韓原濬字發之父應庚萬歷丁丑進士歷官監察御史學

者稱西軒先生西軒公年逾商瞿未舉丈夫子元配郝孺人憂之聘於劉爲亞室是生濬幼而早慧年十七西軒公捐館舍郝孺人年已耄矣劉母佐持家秉御僮奴嚴而有則擇良師傳濬一動止不少假以故折節讀書循循如寒士甫弱冠爲邑庠生後選入太學庚午之變孺人度城不能守以五千金詣監軍犒師已而遍召族黨縱其所取僅以千金貽濬俾出亡於外曰若行以存韓氏祀吾死守門戶耳甲申神京陸沉以林慮可以避兵乃攜孥以行久之遷鄆陵繼乃買田密縣結廬大隗山之麓而居焉丙申冬卒於密縣享年六十了畢業奉

骸骨還葬西軒公墓側容城孫徵君奇逢誌其墓

崔啟亨字建初盧龍人少孤撫于族祖家天啟甲子舉于

鄉庚午

大清兵入郡城時

太宗皇帝延攬賢才聞啟亨名授灤州牧啟亨堅辭

太宗賜以乳酒十巨觥啟亨性不善飲至是連舉盡醉次日不知所終

流寓

明

劉寅字紹和江西安福人代父戍盧龍雖在行伍勵志讀

書巡撫鄒來學閱其文大驚待以殊禮送之試京闈舉
酒祝曰汝此行必取解首否則無相見衆竊笑之是秋
果中第一仕至南工部尙書寅少罹窮苦故歷官自奉
涼薄食不重味一衣二十年爲能儉以成廉云

畿輔志

魯紹芳浙江餘姚人性恬澹積學有蘊藉萬歷初因祖成
山海依焉乃設教關門以戴禮訓諸庠生榆之治禮者

多出其門

畿輔志

黃象奎江西贛州人原姓李名逢月天啟辛酉舉人授兩
當知縣以土寇破城逃匿至灤州祝髮蕭寺諸生蔡君
見而異之勸勉畜髮與共筆硯開館橫經後教授撫寧

士多出其門奎邃于易精岐黃之術施藥濟人全活甚
衆卒塋紫荆山下

黃衍相字六治蒲田人太學生肆力古文歌詩猶擅臨池
博求名帖規撫神似以宰相黃中五薦任中書侍直遷
工部郎管司經局正字時次輔魏廣微疏抹楊左爲衍
相手書璫銜之傳旨切責削籍押出都門崇正初詔復
官絕意仕進不赴流寓灤州年七十卒開平寺金剛經

灤治前碑皆其筆云

灤州志

王元輔揚州興化人幼隨父宦遊永平遂家焉姿性過人
爲文千言立就補郡弟子員家貧授徒養親曲盡誠孝

郡人韓令尹應奎妻以女元輔不愛美飾韓女卽練衣
椎髻躬行儉素夫妻相敬如賓有鮑宣桓少君之風焉

庚午之變没于兵

盧龍縣志

劉憲孟字聖翼浙江會稽人負性紆澹耽詩書人稱爲書

愚明末入北平籍爲諸生餼於郡庠以談經餬口疾歿

門生輩葬之州原歲時祭祀方仲舒之下馬陵焉

灤州志

張星炳江西人以明經謁選入都兵後無歸縛茹於永平

郡城夷齊里授經自給作詩曰搖落江湖此結廬何期

得傍古人居兒今授室余將老歸思多年已漸除

國朝

李孔昭玉田人明季孝廉與杜相國立德同榜安貧樂道

教授生徒喜爲人言忠孝大義及利濟生民之業時

大清兵數入關孔昭乃隱於昌黎五峯山迨我

朝定鼎杜相國作詩諷之出仕兼餽以酒昭受其酒答以

詩曰玉堂金馬君思我流水高山我憶君若問故人何

所樂北牕笑傲醉斜曛竟不出

林徵韓字退思其先閩人也舊家海濱國初避海寇之亂

薄遊章水會逆藩不靖

國家有事東南乃梯黔航楚浮家郢下流寓京師愛畿東

山水卜居昌黎禪伏山陽謀終老焉性洒落少負不羈

生平足跡所歷幾徧天下年過半百遂息影蕭齋徜徉
自適性喜吟詩率不存稿著忘餘錄以紀其遊歷述其
見聞焉

方伎

明

趙楷樂亭人補弟子員幼聰明得麻衣訣然不欲輕以術
售人撫寧翟中丞鵬家居時楷望見輒語人曰翟當重
用第不終爾已而果然王司徒好問未遇時意殊鬱鬱
楷曰君當清貴可上卿無憂不第後亦驗又自知休咎

言如左券

縣志

梅如玉遷安黃崖人嘗從遵化牛東陽

號了義

授三元通天

照水經二卷不著作者姓氏云得之易水上異人爲人
相宅百無一失其言休咎如指掌嘉靖中如玉爲河內
尹以傳邑人張九一九一以付梓盧龍韓西元詳之釐

四卷

見郭造卿
碣石叢談

劉冠河南儀封人祖浩從太祖取張士誠有偵寇功授都
指揮不受願就醫隨徐武寧調理軍士遂家山海冠世
其業爲醫不輕試藥餌預知吉凶時主政鄔公艱嗣寵
姬多人內有娠者嘗以疾求診脉冠曰請以麩盤印手
訖出盤冠曰此非病乃喜兆也主生男後果驗詹大司

馬家居病痰一醫自京來邀冠相陪冠一見卽告司馬
曰亟送回此醫公疾無恙司馬然而送之至潞河驛醫
爲馬軼躡死預斷諸如此類號爲神醫

仙釋

金

王川子姓王氏失其名在灤州長寧店西建庵尸解莫知
所在後有人嶺南見焉

元

白雲子姓王氏失其名初居灤州五山因鮮卑金吾元帥
請住持長寧觀闡元教至元二年賜號廣德真人

淨聰乃東溟宋氏幼削髮爲僧遊清水興國寺師藹公頗
多解悟於是遍歷叢林探華嚴金剛奧旨後於雲峯得
訣始歸構庵不出至元乙卯入定諸沙門爲造浮屠有
月泉老衲訪道清溪爲聰作銘後至明成化初塔裂啟
之止舍利二三存焉

明

楊不語灤西人性淳實甘淡泊寡言笑幼出爲僧明初時
棲祥雲島古刹嘗寂然竟日初不侈口講談人呼爲楊
不語亦特信其淳實未之奇後往往見二虎來卧寺門
不語汲水飲之虎馴不加害始知有行至宣德間百歲

餘化

馬真一自稱河南人年一百八十餘歲昔在華山學道崇正初年來入廣寧居北鎮廟採蘑菇拾野菜爲食時大早經畧袁公崇煥曾使人致之祈雨次日果雨但語言顛狂舉止踈放袁怪之目爲妖妄羈遲山海遇關憲梁公廷棟尤加親洽與談休咎皆應講經論藝剖抉如流飲食不拘葷素取足而止詎諧之中往往皆成讖兆蹤跡無常人不能測後不知所之

祥邁別號如意野老住持昌黎道者山性警敏洞悉禪機嘗著蓮花經序及註釋序成佛前祝曰某愚昧恐不能

補遺

國朝

李廷桂字瑞英盧龍人康熙年拔貢性豪爽學最博尤善風鑑嘗宴嫺家指臧獲中一人語主人曰若者不爲干城定聚綠林非君家所宜有也主人遂善遣之後果爲邏者得旋脫去卒以武功顯由是世咸服其灼見而能免人於禍平生持躬儉樸賙卹里黨無吝色德容且不畏權要里有豪右欲塞巷以廣廬舍衆莫敢撓桂獨挺身相抗巷賴以存至今居民便之長子忠恩貢次子肅增生孫向春庠生曾孫美廩生

翟正經字遷齋廬龍人平山司訓鳳翥孫也少失怙恃安
貧勵行康熙癸酉登賢書壬辰成進士就職左衛教授
教士先器識而後文藝爲大中丞趙公許可延爲會城
義館師一時知名之士多從之及補山海教授修理黌
宮捐設祭器講學論文士風丕振乾隆元年以卓異授
江南建平令仁慈居心平允持法未幾卒於官士民追
慕不忘其輓詞有云百日仁風周蔀屋千秋清節照郎
川其事實可概見矣子九苞國學生孫賜鉞雍正乙卯
科武舉人賜書廩貢會孫曉庠生

龔巖字子真廬龍人康熙辛卯舉於鄉慎行寡言事繼母

以孝聞素慕薛文清之爲人因顏其齋曰敬軒郡守滿
公雲鵬以孝廉方正舉堅辭不就選深澤教諭盡職奉
公振興士習歷九年卒于官櫬輿旋里執紼者百餘人
皆失聲歸卽請諸官並享於深邑七賢祠子長采次會
孫應綸應紳俱庠生

張廷璇字衡齊廬龍人才敏性摯未冠入庠識者咸器之
事父母曲盡色養相繼遭內外艱廬墓三年手植樹木
封土巋然遠近高其誼從遊者衆一時知名之士多出
其門

其門

捷士澁然鼓而前其辭於發者衆一得味谷之士之則

其父世曲直也委匿雖嚴內伏莫測焉三季乎其樹木

其或與空海極其歸人本為封雖未試人孰能奇其器之

其感餘感味其秋也

昔夫野說明前衛官並享故我身之習賦于吳水水合

公乘與士野想也半卒于官雖與然其時雖各百物人

公乘歸以衣無衣五舉忍痛不意殺來漸殊嗚豈無辜

其

